



續文獻通考卷之二百二十二

皇明進士雲間王圻纂輯

物異考 山崩至恒寒

山崩

宋孝宗紹熙四年秋南嶽祝融峯有山自摧

度宗咸淳元年天目山崩餘杭民溺死者無筭

元

世祖至元六年九月奉化州山崩水湧出平地溺死人甚

衆松陽龍泉二縣水漲入城中深丈餘溺死五百餘人

道昌縣尤甚平地三丈餘桃源山崩壓溺民居五十三

家死者三百六十餘人

成宗大德元年衡州鄱縣山崩 十一年三月道州營道縣暴雨山裂百三十餘處

武宗至大三年荆襄大水山崩壞官民廨舍二萬一千八百餘楹死者二千四百餘人

仁宗延佑二年夏四月成紀縣山移是夜疾風電雹北山南移至夕河川次日再移平地突出土阜高者二三丈

陷沒民居 四年七月成紀縣山崩土石潰徙壞田稼廬舍壓死居民甚衆 五年二月泰安縣山崩 五月

隴西縣山崩 七月寧遠縣山崩 六年八月伏羗縣山崩秦州成紀縣暴雨山崩朽壤墳起覆沒畜產

英宗至治二年十二月朔南康建昌大水山崩

泰定帝泰定元年八月成紀縣大雨山崩水溢壅土至來

谷河成土阜 四年八月鞏昌通渭縣山崩天全道山崩石斃人

順帝元統元年鞏昌徽州山崩 九月秦州山崩 十月鳳翔山崩 十一月鞏昌成紀縣地裂山崩辛亥秦州

地裂山崩 至元二年五月秦州山崩宿松山裂 四年六月信州路靈山裂丙辰鞏昌府山崩 六年六月

秦州成紀縣山崩地裂 至正二年六月濟南山崩 七月惠州雨水羅浮山崩凡二十七處壞民居塞田澗

三年六月秦州奉安縣南坡崩裂壓死人畜 七月鞏昌山崩人畜死者甚衆 六年六月廣州增城縣羅

浮山崩水湧溢溺死者百餘人 七年五月河東地拆
泉湧崩城陷屋傷人民 八年廣西山崩 九年靖海
寧州山巖俱裂湧水人多死者 七月泉州大風雨永
春縣南象山崩壓死者甚多 十年五月龍興寧州大
雨山崩數十處丙寅瑞州上高縣 崩 十月泉州
安溪縣侯山鳴 十二年十月霍州趙城縣霍山崩湧
石數里前三日山鳴如雷禽獸驚散 十三年七月汾
州白彪山拆 十五年四月寧國敬亭麻姑華陽諸山
崩 十七年十月靜江路城東石山崩 十二月慶元
路象山縣鷲鼻山崩有聲如雷 二十六年三月贛榆
縣吳山崩 六月沂水山崩紹興山陰縣卧龍山崩
七月泉州同安縣大雷雨三秀山崩是月河南鞏縣大
霖雨地震山崩 十一月華州蒲城縣洛岸崩壅水絕
流三日 十二月華州蒲城縣洛水和順崖崩其崖戴
石有岩穴可居是日壓死避亂者七十餘人 二十七
年六月沂水山石崩裂有聲如雷 七月靜江靈川縣
大藏山石巖崩 二十八年龍興靜安縣山石迸裂湧
水人多死者 六月忻州蒙昌山有巨石大如屋崩裂
墜地聲震如雷 七月廣西靈川縣臨江石巖崩

皇明

成祖永樂中山東濱州妖嬪唐賽兒祭夫墓還山石裂露
一石匣啓得寶劍妖書通曉其術惑衆聚徒謀反後捕

得之竟從獄中逸去官吏將校皆伏誅

英宗正統八年冬十一月浙江紹興山移于平田是年陝西二處山崩壓折人家數十戶一應山叫三日移數里時畏王振不敢奏

孝宗成化八年七月陝西隴州大雹州北有山吼三日裂成溝長半里 庚子五月雲南麗江軍民府巨津州白石山約長四百餘丈去金沙江二里許一日山忽裂分其半走金沙江中山上木石依舊江水壅塞淹田漂廬府州具報察院以聞時滇中邊報日急識者以為山徙之兆 十六年六月長樂縣平地起小阜人畜踐之輒陷明年尋湧起一高山占者云武后時曾有此異乃女

主為男之兆時 裕陵宮人萬氏 冊為貴妃每侍

宸遊戎服男飾以從此其應與

世宗嘉靖二十六年十二月十四日陝西澄城縣麻陂山界頭嶺晝夜大吼如雷至二十七日夜山忽中斷百丈移走東西三里南北五里

穆宗隆慶四年八月浙江湖州府山崩成湖

今上萬曆二十七年九月狄道山崩成坑更於平地湧出大小山五座

地陷

元順帝至正十七年冬十月靖江地陷

皇明

世宗嘉靖四十二年北京觀象臺忽崩陷時雷尚書禮覓臺四圍並無餘土更不知土從何去三日後訪知臺土移填於城外某潭潭且夷矣

穆宗隆慶二年樂亭縣地名劉卞庄地裂一處寬一尺長三丈又迤東地裂一處寬一尺長一丈又地名揚鑿坨地裂一處寬一尺長三丈各湧黑沙水出 五年辛未春三月廣西布政司後街 宗室住宅忽地陷一丈寬二丈餘又 王府大街地陷二丈深廣數尺又布政司後堂地陷四尺橫二丈五尺直一丈六尺餘 今上萬曆十四年保定府一村庄墻忽崩中有弓箭刀劍之類

地生異物

金哀宗正大七年十二月新衛北三里許有影在沙上如舊城衛州城狀寺塔宛然數日乃滅

皇明

憲宗成化十三年二月甲午浙江山陰縣地忽湧泉如血高尺餘

世宗嘉靖四十四年浙江慈谿縣民家地湧血尺餘 江西廬山田中湧血數畝亦高尺餘 三十七年浙江東陽縣民張思齊家地裂五六處各湧血如線高尺許疑爲片人就食之掘地無所見撫按上狀 三十九年竹谿縣地震出血

今上萬曆二十六年九月浙江巡撫劉元霖奏地方災異
蕭山縣賈大經家灶前地下湧出鮮血約高尺許

青青青祥

金章宗太宗二年七月癸丑申刻日上有氣內赤外青須
臆乃散

皇明

今上萬曆二十九年忽見昭應寺藏經閣上大小瓦獸共

六個各口吐青氣一道冲天半時方散

赤青赤祥

遼道宗時皇太叔重元將舉兵反帳前雨赤如血識者謂
敗亡之兆果敗死

金太祖為祥穩時温都部跋忒殺唐括部跋葛穆宗命太

祖伐之太祖入辭謂穆宗曰昨夕見赤祥此行必克敵

遂行果克之

世宗未即位時居貞懿皇后喪一日方寢有紅光照室

章宗明昌二年十二月丙辰北方微有赤氣 泰和三年

十月戊戌日將沒色赤如赭甲申酉時天色赤將旦復

然 五年九月戊子戌時有赤氣如火出黑雲間自西

北左旋至東南皆赤中有白氣乍見為風雨而散二更

初復有赤氣起黑雲間自西北左旋至東南往來遊曳

有白氣數道時復出沒其赤氣又滿中天約四更散

宣宗貞祐三年二月丁巳日初出赤如血將沒復然 元

光元年十一月丁未東北有赤雲如火

哀宗天興三年正月巳酉日大赤無光

元世祖中統二年春正月辛未夜東北赤氣照人大如席
順帝元統二十三年十月丙申朔大各路抵青齊一方有
赤氣照耀千里至正五年四月鎮江丹陽縣紅霧草
木葉及行人衣裳皆濡成五色二十一年昆明縣玉
案山下產赤小犬色如火羣吠遍野

皇明

世宗嘉靖十九年夏四月黃霧四塞俄變紫赤色忽暴風
從西起坊柱皆折上曰此異凡三見矣占曰兵喪西
北邊防不可不慎癸未四月真定無極縣有芒氣自

西北來先紅後黑咫尺不辨人折大樹無筭鷄犬亂鳴

四十年五月晦日赤虹二道自西北經東南亘天

穆宗隆慶二年四月萬全都司有空中赤黑二雲相聞

今上萬曆十九年八月浙江巡撫常居敬奏據巡視海道
葉分等呈稱寧波府慈谿縣申本縣八都二畝里長陸
涑本月十九日未時有民人邵二五等駕船于八都茅
家浦口載稻內翁文行曲江塗適見紅血從草湧出約
有八處大如面盆高尺許標起血星濺到船上致人足
上足亦出血約有半時方止

黃雉黃祥

金章宗承安五年十月雲色黃而風霾

宣宗貞祐三年十月西北有霧氣如積土至二更乃散
哀宗至大元年正月上初視朝尊仁聖慈聖二皇太后是
日大風昏霾不見日黃氣塞天人以為壬辰癸巳之兆
皇明

穆宗隆慶元年四月京師黃塵四塞 三月癸亥黃霧四
塞

白雉白祥 天雨毛 地生毛

金世宗大定五年六月地生白毛 十四年八月白龍見
於御帳之東 二十年五月京師地生黑白毛 二十
二年五月地生白毛 二十九年五月地生白毛
章宗明昌元年二月地生白毛

衛紹王大安二年三月北方有黑氣如堤內有白氣三似
龍虎之狀 十月東北西北每至初更如月將出之狀
明至夜半而滅經月乃已

宣宗貞祐元年十月夜有白氣二衝紫微而不貫 十二
月白氣東西竟天移時散 興定元年十二月北方有
白氣廣三尺餘東西亘天

哀宗至大三年三月省前有氣微黃自東北至西南其狀
如虹中有白物十餘往來飛翔又有光倏忽如二星移
時乃滅 四年六月有白氣經天或云太白入井

元世祖至元二十七年五月大名路有白氣二道
仁宗皇慶元年丁卯雨毛 二年八月黃梅縣天雨毛

順帝元統二年正月彰德路天雨毛如線而綠 至正十
八年四月山東天雨白毛 十九年八月安仁恠物見
空中白色頭黑尾銳雷震忽失所在 二十五年五月
京師天雨毛 二十七年五月朔白氣亘天山東天雨
毛

皇明

英宗正統八年浙江地動生白毛

憲宗成化十五年五月乙丑常州府地震生白毛 二十
一年春正月甲申朔申刻有火自中天西墜化白氣復
曲折上騰聲如雷踰時復有大星赤色自中天西行近
濁尾跡化白氣曲曲如蛇形久之如雷震地

世宗嘉靖七年戊子冬十二月望白氣亘天津起乾指坤

八年秋七月長庚氣如匹布亘天

今上萬曆十九年三月陝西巡按御史周盤奏邊鎮孤懸
災異迭見等事二月初五日白氣傍月光內穿閣上瓦
獸吐黑氣 初十日亥時遙見天上白氣一道從西南
乾方起至東南巽方止傍月光內穿過半時方散

黑青黑祥

金衛紹王大安元年四月北方有黑色如大道東西竟天
至五更散

宣宗貞祐元年八月將曙大霧蒼黑跬步無見 二年六
月有黑氣廣如大路自東南至西北其長竟天 四年

正月旦黑霧四塞巳時乃散 興定三年四月癸未陝西黑氣晝起有聲如雷

哀宗至大二年正月甲申有黃黑之祲

元

世祖至元七年四月壬午檀州隕黑霜 大德十年二月

大同路暴風大雪明日雨黑沙陰霾牛馬多斃死

仁宗延祐七年八月益津雨黑霜 癸亥十月六日甲子

先一夕因晉邸入繼大統告祭太廟之頃陰風北來殿

上燭燈皆滅良久方息蓋攝祭官銖失也先帖木兒等

皆弒君之元惡也

順帝至正元年四月彰德有赤風自西北來忽變爲黑晝

晦如夜 十二年荆門天雨黑雪 十三年春正月二

十三日黑氣亘天雷電以雨有物若果核與雨雜下五

色間錯光瑩堅固破其實食之似松子仁人皆曰婆娑

樹子至閏月十二日復雨三月十八日杭州亦雨如湖

州郡人初不以爲意及九月十日紅巾犯省治雨核之

地悉被兵火屋宇如故二十六日湖州陷儀鳳橋四向

焚戮特甚雨時橋四向視宅處獨多後聞池州亦然池

州之禍尤慘 冬袁州路每日暮有黑氣環遶郡城

十五年湖廣雨黑雪 十六年正月二十三日日入時

平江在城忽望東南方軍聲且漸近驚走覘視他無所

有但見黑雲一簇中彷彿皆類人馬而前後火光若燈

燭者莫知其筭迤邐由西北方而沒惟葑門至齊門居民屋脊龍腰悉揭去屋內牀榻屏風俱仆醋坊橋董家雜貨舖失白米十餘石醬一缸不知置之何地 十七年正月己丑杭州降黑雨河池水皆黑 十八年三月辛丑夜大同路黑氣蔽四方有聲如雷頃之東北有雲如火交射中天遍地俱見火光空中如有兵戈之聲 七月乙亥京師黑霧昏暝不辨人物自旦近午始消如是者旬有五日 二十八年七月乙亥黑氣起百步內不見人從寅至巳方息

皇明

太祖洪武十年丁巳春正月丁酉夜雨黑水如墨汁池水皆黑浙江金華處州諸境皆有之占云黑雷露下天下
寃

憲宗成化十二年丙申秋七月庚戌京師黑青見兼旬始息是青也黑而小金睛修尾狀類犬狸先從西城北隅起時坊巷細民家男女夜多露宿忽見有物負黑氣一片而來或自戶牖入雖密室亦無不至至則人昏迷或手足或頭臉或腹背皆被傷傷亦不甚痛人莫敢言數日遍城驚擾入夜家操刃張燈自防見有黑氣來輒鳴金擊鼓以逐之巡城御史以聞一日 上御奉天門侍衛忽驚起兩班遂喧亂 上欲起太監懷恩按之頃之乃定

世宗嘉靖四十三年六月十四日黑虹見北方占曰兵象
至十二月虜果犯京城 四十五年三月 上不豫久
御西內恩成宮時有黑氛出擾而披欄藻井上忽見
木綿數團 上心疑之 命內臣慎火尋又曰宮孽有
謂壬寅社死者所爲其藍田玉等獄 命速訊成之
穆宗隆慶六年四月浙江省城黑霧中一物蜿蜒如車輪
目光掣電冰雹隨之瓦屋皆震林中鳥雀擊死無筭

恒雨

宋寧宗嘉定九年浙東西大霖雨二十餘日郡縣爲災
十一年六月浙西大霖雨至十五年十六年亦然 十
六年五月湖北霖雨鄂州江湖合漲城市沉沒累月不

洩

聖宗寶慶二年三月久雨四月八月亦然 二年七月久
雨命臨安守臣禱于天竺山 端平二年霖雨害稼命
近臣禱于天地宗廟社稷及宮觀嶽瀆等

度宗咸淳十年八月大霖雨水湧安吉臨安餘杭民溺死
者無筭

遼聖宗統和元年九月南京霖雨害稼至九年六月亦然
十一年六月大雨 二十七年七月霖雨 開泰六
年六月德妃蕭氏賜死葬兔兒山西後數日大風起塚
上晝晦大雷電而雨踰月乃止

道宗咸雍二年四月霖雨 四年南京霖雨 太康八年

七月南京霖雨時蕭文知易州霖雨不止為文禱之隨霽

金太宗天會二年曷懶移鹿古水霖雨害稼 秋秦州潦害稼

章宗明昌元年七月大雨傷稼 四年五月霖雨命有司祈晴 五年七月陰雨連日至丙戌天壽節開霽

衛紹王大安二年六月雨不止

宣宗興定元年七月霖雨

哀宗天興二年六月欲遷蔡發自歸德連日大雨平地水數尺軍士漂沒

元

世祖至元七年八月辛卯保定路霖雨傷禾稼 九年六月

月丁亥京師大雨壞墻屋壓死者衆 十年霖雨害稼

十二年河間霖雨傷稼 二十年六月武安大雨

二十四年真定等路霖雨害稼屋壞壓死者衆 六月

霸州益津縣霖雨害稼 九月太原河間河南等路霖

雨害稼東京靜麟威遠婆娑等處大霖雨害稼沒民田

二十五五年七月保定郡霸滹二州淫雨害稼 八月

嘉祥魚臺金鄉三縣淫雨 九月莫獻二州淫雨 二

十六年六月濟寧東平汴梁濟南順德真定平灤棣州

霖雨害稼 二十八年八月大名清河南樂諸縣霖雨

為災 九月河間淫雨

成宗大德二年秋七月大雨河決 五年八月霖雨灤漆
泚汝水溢 十月濟南濱棣泰州等霖雨害稼楊泰滁
壽光隨荆門峽州霖雨 六年霖雨 七年七月平江
等十五路淫雨害稼 八年濬滑霖雨大名境內咸被
水

武宗至大元年秋七月真定淫雨 二年七月德州淫雨
三年大名路霖雨傷稼 四年七月河間順德大名
彰德廣平等路德濮恩通等州及河東祁縣霖雨害稼
五年六月二十三日平陽颶風暴雨沿江田禾淹損
大半 六年二月曹濮二州霖雨害稼 七月霸州文
成縣霖雨害稼三十餘頃

英宗至治元年江州贛州淫雨安陸雨七日江水大溢被
災者二千五百人 二年閏五月安豐路雨傷稼 三
年五月大名魏縣淫雨保定定興縣濟南無棣厭次縣
濟寧碭山河間齊東縣霖雨害稼

泰定帝泰定元年濮州等處淫雨深丈餘 七月真定廣
州廬州十一郡雨傷稼德州曹州淫雨水深丈餘漂沒
田廬 八月汴梁考城儀封等處利津等縣霖雨損
禾稼

明宗至順四年京畿大霖雨水平地丈餘
順帝至元二年五月乙卯南陽鄧州大霖雨自是日至六
月甲申乃止 三年六月衛輝路淫雨京師大霖雨自

辛巳至癸巳不止御河沁渾河水皆溢没人畜田廬甚
眾壬辰彰德大水深一丈 至正二年秋彰德路霖雨

三年四月至七月汴梁路滎澤縣鈞州新鄭密縣霖
雨害稼 四年夏汴梁蘭陽縣許州長葛鄆城襄州睢

州歸德府亳州之鹿邑濟寧之虞城淫雨害蠶麥禾皆
不登 四月淫雨河溢決白茅金隄曹濮濟兗皆被灾

八月淫雨益都饑民有相食者 五年夏秋汴梁祥

符尉氏洧川鄭州鈞州亳州久雨害稼二麥禾荳俱不
登河間路淫雨妨害鹽課 八年五月京師大霖雨都

城崩圯鈞州新鄭縣淫雨害麥 九年七月高唐州大
霖雨壞官署民居歸德府淫雨浹十旬 十年二月彰

德路大雨害麥 十四年四月吉安霖雨洪水驟至平

地數丈漂沒民居田產 十九年岳州大雨經八十日

二十年七月益都高苑縣陝西澠池縣大雨害稼

二十三年七月懷慶路河內修武武陟三縣及孟州淫

雨害稼 二十四年秋密州安丘縣大雨 二十五年

秋密州安丘縣潞州汴梁許州及鈞州之密縣淫雨害

稼 二十七年秋彰德路淫雨

皇明

今上萬曆十五年蘇松等處自五月六月七月久雨禾黍

花荳悉皆淹沒 二十四年浙江巡撫劉元霖奏杭嘉

湖二府七月淫雨連綿苗秧淹沒八月以後大雨如注

狂風交作經數日夜不息迄至閏八月終尚未開霽以致山洪暴發河流橫溢廬舍傾圮圩岸頽潰四顧郊原並成巨浸 二十八年七月十八日至二十二日興化莆田等縣大雨連作五晝夜城垣橋梁堤岸傾圮殆盡福安連江等處亦大雨三晝夜官舍民廬塌潰者十之七八 二十九年自春及夏蘇松嘉湖等處淫雨不止二麥浸爛江湖水溢秋禾不能栽種

天雨異物

遼道宗咸雍四年六月西北路雨穀方三十里

金世宗大定十二年三月庚寅雨土 十六年三月戊申

雨豆於臨潢之境其形銳而赤食之味頗苦 二十三

年三月乙酉氛埃雨土

哀宗天興三年正月己酉京索之間雨血十餘里是時蔡

城陷金亡

元

世祖至元二十四年諸王薛徹都部雨土七晝夜沒處牛

畜

成宗元貞二年處州天雨米黑色 大德十年六月大同

平地縣雨沙黑霾斃牛馬二千

仁宗皇慶元年六月丁卯雨毛 二年八月黃梅縣天雨

毛

英宗至治三年二月丙辰雨土

泰定帝致和元年三月壬申雨霾

文宗天曆二年三月丁亥雨土霾 至順二年三月丙戌

雨土霾

順帝元統二年正月庚寅朔河南省雨血是日衆官晨集
忽聞燔柴煙氣旣而黑霧四塞咫尺不辨腥穢逼人逾
時方息及行禮畢日過午驟雨隨至霑洒聖墻及裳衣
皆赤 六月彰德雨白毛 至元三年三月天雨線
四年四月辛未京師雨紅沙晝晦 至正元年礮嘉縣
天雨鉄民舍山石皆穿人物遇之皆斃 五年春庚寅
信州雨土 十一年十月衢州東北雨米如黍 十二
月建寧浦城縣雨黑子如稗實邵武大雨震雷雨黑黍

如蘆稜信州雨黑黍鄱陽縣雨菽豆郡邑有民取而食
之 十二年湖廣雨粉針民家門戶壁柱之間有粉痕
如針樣無數 十三年秋七月丁卯泉州雨白絲 十
五年春蘇州雨血 十六年七月延安路鄜州雨白毛
如馬鬃屬邑亦如之 十七年四月冀寧榆次縣雨白
毛如馬鬃 七月象州雨白絲 十八年五月益都雨
白毫冬衢處等州雨黑黍內白如粉草木皆萌芽吐花
十九年三月興化路連日雨毫 二十五年五月甲
子京師雨毫長尺許如馬鬃或言于帝曰龍鬚也命拾
而祀之 六月戊申京師雨魚時大雨魚隨雨而落長
尺許人取而食之 二十七年五月益都雨白毫 丙

午八月辛酉上海縣浦東俞店橋南牧羊兒三四聞上
恰恰有聲仰視之流光中墮一魚刺成二創其狀不常
見自首至尾根僅盈尺似濶霸而短是日晴無陰雲亦
無鷓鴣之類甚可怪也日將晡縣市人闕然指流星自
南投北卽此時也橋下一細民家欲取烹食其妻盪而
藏之來者多就觀焉或曰志有云天墮魚人民失所之
象二十一年昆明縣天雨鐵傷禾稼民居半圯

皇明

憲宗成化元年二月天雨黑黍於襄陽十三年丁酉春

山陰雨血射人夏六月京師雨錢

孝宗弘治庚戌三月陝西慶陽府雨石無數大者如鵝鴨

卵小者如鷄頭實皆作人語說長短八年二月洮州

雨霜六月夥縣雨豆

世宗嘉靖六年丁亥五月甲午京師雨錢秋七月壬辰

南京雨血二十一年象山縣雨黃霧行人口耳皆塞

穆宗隆慶二年四月御史周弘祖言天雨黑豆又漢中

南鄭縣雨土

甘露

宋太宗祥符六年春三月鹿邑太清宮甘露降

徽宗宣和七年甘露降

高宗紹興三年知撫州郡高衛言甘露降於撫州祥符觀
爲圖上之十九年湖廣甘露降

遼穆宗應曆十四年四月黃龍府甘露降

聖宗統和九年八月東京甘露生

道宗大安九年四月興中府甘露降遣使祠佛飯僧

金熙宗天會十三年四月甘露降于熊岳縣

元順帝至正六年八月龍興進賢縣甘露降 二十年十

月國子監大成殿松栢樹上甘露降

皇明

太祖洪武二年己酉冬十月甲戌膏露降於乾清宮後苑

蒼松之上光潤如酒凝結如珠肪白飴甘彌布松栢

四年辛亥冬十月甘露降于鍾山沾潤草木瑩若凝脂

美若醍醐 五年冬十一月甘露又降越明年仍降如

初

成祖永樂十七年己亥十一月甘露復降于 孝陵之松

栢凡四日凝為玉脂融為瓊液粲若垂珠聯若編貝其

芳香之氣甘美之味芳達莫可擬倫時 仁宗為太子

監國遣人採獻 成祖祇薦 宗廟 頒賜百官

憲宗成化六年庚寅春甘露降于郊壇松栢 上親御齋

官取以 賜百官大學士彭時翰林學士尹直撰甘露

頌以進

世宗嘉靖七年春正月甲戌朔甘露降長泰縣 九年庚

寅冬十二月己卯甘露降于 顯陵守臣以聞 明年

正月辛卯 上親製欽天記頌 十七年春甘露降龍

溪縣巡按奏進 上以 賜各部大臣 四十一年壬戌其露降于承天 皇陵之松樹時鎮守太監張方以獻 世宗悅群臣稱賀仍遣成國公朱希忠往承天祭告 陵寢其承天分守叅議及知府太監各賞銀有差

恒賜

宋寧宗嘉定十四年兩浙旱浙東尤甚

理宗嘉熙四年處州福建大旱 淳祐七年夏六月巳酉

旱 十一年閩旱 寶祐元年閩旱 五年處州旱

度宗咸淳十年閩旱長樂福清二縣為甚處州亦旱

遼

穆宗應曆十二年五月旱命左右以水相沃頃之果雨

十六年正月以歲旱泛舟於池禱雨不雨舍舟立田中

禱乃雨 十七年四月射柳祈雨復以水沃羣臣

景宗保寧元年五月旱射柳祈雨 七年四月旱

興宗重熙九年六月旱射柳祈雨 十五年楊枯為定武

軍節度使時亢旱視事夕大雨民歌之曰何以蘇我上

天降雨誰其撫我楊公作主

道宗咸雍二年七月以歲旱賑山後貧民 十年四月旱

太康六年五月以旱禱雨命左右以水相沃俄而雨

降

天祚帝乾統元年四月旱 八年六月旱射柳祈雨 時

蕭文知易州大旱百姓憂甚為文禱之輒雨

金

熙宗天眷三年六月大旱使蕭彥讓田穀決西京囚

世宗大定四年五月旱癸卯勅有司審冤獄禁宮中音樂

放毬場役夫詔禮部尚書王競禱雨于北獄壬子雨

九年六月以久旱命宮中毋用扇庚子雨 十二年四

月旱 十六年五月中都河北山東陝西河東遼東等

十路皆旱 二十年七月旱 又夏旱俾長安令取太

白湫水時完顏宗道知京兆府步迎于遠郊及城雨是

歲大稔人以爲精誠所感

章宗明昌元年夏旱 二年五月桓撫等州旱 秋山東

河北旱 三年秋緩德旱 承安元年自正月至五月

不雨命徙市乃雨詔復市如常 二年自正月至四月

不雨 四年五月旱 泰和二年四月旱 五年夏旱

衛紹王大安二年四月山東河北大旱 三年三月山東

河北河東諸路大旱 崇慶元年七月河東陝西山東

南京諸路旱 二年陝西河東大旱 至寧元年七月

以河東陝西諸處旱遣工部尚書朶剌斡祈雨於嶽瀆

三年四月自去冬不雨至於是月 四年七月旱 興

定四年六月旱 五年三月以久旱詔中外仍命有司

祈禱 元光元年四月京畿旱

哀宗正大三年四月旱 天興二年六月自歸德遷蔡連

日大雨及蔡始晴復大旱四月識者以爲不祥

世祖中統元年澤州潞州旱 三年五月東平州濱棣二

州旱 四年八月真定郡及洛滋等州彰德路旱十一

月東平大名等路旱 至元元年二月東平太原平陽

旱分命西僧禱雨 三年夏黃州旱婺州春不雨至秋

八月十二日西京北京益都真定東平順德河間徐宿

邳旱 三年京兆鳳翔旱 四年順天東鹿縣旱 秋

八月邵武大旱 五年十月京北大旱真定旱 六年

澧州雲內東勝及廣平路旱 七年三月益都登萊旱

七月山東諸路南京河南兩路旱 九年六月高麗

旱 十二年衛輝太原等路旱 十三年十二月平陽

路旱 十五年西京奉聖州及彰德等處旱 十六年

七月趙州保定路旱 十七年大都北京懷孟保定南

京許州平陽旱 十八年二月廣寧北京大定州旱是

年平陽路松山縣旱 十九年真定以南旱民多流移

二十二年五月廣平汴梁鈞州鄭州懷孟濮州東昌

廣平平陽彰德衛輝旱 二十三年平灤太原旱 五

月汴梁京畿旱 二十四年春平陽旱二麥枯死秋種

不入土 二十五年東平路須城等縣安西路商耀乾

華等十六州旱 二十六年絳州大旱 二十七年夏

四月平山真定藁強三縣旱 二十九年二月壬辰山

東棣州境內大旱 三十年真定寧晉旱

成宗元貞元年六月環州葭州及咸寧伏羌通渭等縣旱

七月河間肅寧樂壽二縣泗州賀州旱 八月真定

路旱 二年八月大名開州懷孟武涉縣河間肅寧縣

及真定旱 九月莫州獻州旱 十月化州旱 十二

月遼東開元二路旱 大德元年濟南及金復州順德

河間大名平陽旱 六月汴梁南陽大旱民鬻子女

七月荆南郡旱 八月丁巳寧海州大旱 九月江陵

鎮江丹徒金壇二縣旱 十二月平陽曲沃縣旱 二

年五月衛輝順德平灤等路旱 三年五月荆河諸郡

及桂陽寶慶興國二路旱 十月揚廬隨黃等州旱

四年平棘白馬二縣旱 五年六月汴梁南陽衛輝大

名等路旱 九月江陵旱 七年台州諸路旱 八年

六月鳳翔扶風岐山寶鷄三縣旱 九年大都旱 七

月晉慶州饒陽縣漢陽漢川旱 八月蒙州融州柳州

屬縣旱 十年台州旱 五月大都京畿旱安西春夏

大旱二麥枯死 十一年台州又旱夏四月不雨至秋

八月人相食

武宗至大元年諸路旱 三年夏廣平大名路旱

仁宗皇慶元年六月濱棣德三州及蒲臺陽信等縣旱

二年九月京畿大旱 四年四月德安旱 延祐二年

春檀蘇濠三州旱夏鞏昌蘭州旱 四年夏四月不雨

德安府旱 五年六月荊州旱 七月真定河間廣平

五年六月荊州旱 七月真定河間廣平

五年六月荊州旱 七月真定河間廣平

中山大旱 七年六月黃蘄二郡及荆門軍旱

英宗至治三年六月大同路旱 二年十一月岷州旱

三年夏順德真定冀寧大旱

泰定帝泰定元年六月江淮湖廣河南景清滄莫等州臨

汾涇川靈臺壽春六合等縣旱 九月建昌郡旱 二

年五月關陝潭州茶陵州興國永興縣旱 七月隨州

息州旱 三年夏燕南河南州縣十有四亢陽不雨

七月關中旱 四年二月奉元醴泉順德唐山邠州淳

化等縣旱 六月畿內江南洛霍綏德三州旱 八月

滕州旱 十二月真定路旱 致和元年二月廣平彰

德等郡旱 八月陝西大旱人相食

文宗天曆元年九月陝西大旱人相食 二年正月陝西

大旱自泰定二年至今不雨 己巳撫州旱自五月至

八月不雨夏真定河間大名廣平等四州四十一縣峽

州二縣旱 八月浙西湖州江東池州饒州旱 十二

月冀寧旱 至順元年七月肇州興州東勝州及榆次

滄陽等十三縣旱 二年霍隰石三州阜城平城二縣

旱 三月浙西旱諸路饑民八十餘萬戶 二年秋八

月真定路自夏至今不雨

順帝元統元年夏紹興旱自四月不雨至於七月淮東淮

西亦旱 二年三月湖廣旱自是月不雨至於八月

四月河南旱自是月不雨至於八月 六月遼東旱

秋南康旱 至元元年四月東平路久旱遣西僧祈雨

夏河南及邵武路大旱 二年蘄州黃州浙東衢州

婺州紹興江東信州江西瑞州等路及陝西皆旱是年

四月黃州黃岡縣周氏頰產一男即死狗頭人身咸以

為旱魃云 六年夏廣東南雄路旱自二月不雨至于

五月種不入土 至正二年彰德大同二郡及冀寧平

晉榆次徐溝縣汾州孝義縣忻州皆大旱自春至秋不

雨人有相食者衛輝亦大旱 三年秋興國大旱 四

年福州大旱自三月不雨至于八月興化邵武鎮江及

河南之桂陽膠州高密縣皆旱 五年曹州禹城縣膠

州高密縣旱 六年鎮江及慶元奉化州旱 七年懷

慶衛輝河東及鳳翔之岐山汴梁之祥符河南之孟津

皆大旱 八年三月益都臨淄縣大旱 五月四川旱

十年夏彰德旱 十一年鎮江旱 十二年蘄州黃

州大旱人相食浙東紹興旱自四月不雨至于九月

桂陽大名俱旱 十三年蘄州黃州及浙東慶元衢州

婺州江東饒州江西龍興瑞州建昌吉安廣東南雄河

南永州桂陽皆大旱 十四年懷慶河內縣孟州汴梁

祥符縣福建泉州湖廣永州寶慶廣西梧州皆大旱祥

符旱魃再見泉州種不入土人相食 十五年衛輝大

旱 十六年婺州處州皆大旱 十八年春蘄州旱莒

州濱州般陽滋川縣霍州鄆州鳳翔岐山縣春夏皆大

旱莒州人自相食岐山亦然 十九年晉寧鳳翔廣西
梧州象州皆大旱 二十年通州旱汾州介休縣自四
月至秋不雨廣西賓州大旱自閏五月不雨至于八月
二十二年河南洛陽孟津偃師三縣大旱人相食
二十三年山東濟南廣西賀州皆大旱

皇明

太祖吳元年丁未夏六月久旱 上日減膳素食宮中皆
然既而大雨羣臣請復膳不許 詔免今年田租 洪
武三年庚戌夏久不雨 上命擇日詣山川壇躬禱先
命 皇后與諸妃執爨爲昔日農家之食令 皇太子
諸王供饋于齋所至日 上素服草履徒步出詣山川

壇設藁席露坐晝曝于日頃刻不移夜臥于地表不解
帶 皇太子捧楹進蔬食雜麻麥菽粟已而大雨歲遂
熟 八年秋八月京師大旱 十四年金陵久不雨
詔罰守城指揮俸罪其不祈雨也 二十六年京師大

旱 詔求直言

憲宗成化八年夏四月京畿自二月至今不雨大風竟日
運河水涸 十五年己亥京省大旱 二十年甲辰夏
五月京畿陝西河南山東山西俱大旱

孝宗弘治八年秋七月西北諸省大旱 十六年癸亥夏
五月京師大旱

武宗正德五年庚午夏六月京師旱霾 十一年丙子夏

五月風霾大旱

世宗嘉靖元年久旱卽位日大雨霑足頃復開霽觀者皆

慶爲中興之兆 二年九月南畿十四郡北畿山東河

南湖廣江西俱旱災赤地千里殍殣遍道 五年江左

大旱 七年北畿河南山東山西陝西大旱 勅求直

言且 諭輔臣盡言以體朕憂 十二年春二月不雨

上祈禱不應因製自咎說示群臣使知警惕 七十

年夏四月兩京山東陝西福建湖廣大旱 二十年畿

內旱蝗議發帑金賑之 三十七年五月大旱禾盡槁

上齋祀高玄忽雷電交至澍雨沾足羣臣表賀 四

十年二月京師不雨 上禱于玄壇得雨 四十二年

因旱乃于正月二十七日致齋禱雨先是傳諭徐階等

曰今日風沙又作必嚴祈禱今旱固未必如前歲而黃

霾土雨災疫或過之擬所舉行勿怠遂有是禱已而又

傳諭云恰纔我樹幡竿微雷安水缸雨零未移時大霾

赤黃異于前日祈祐可緩乎朝天宮等處宜分遣官陪

告行禮遂以五府六部正官輪至四月七日吏部尚書

嚴訥奏云河間等縣聞已得雨初十日大學士徐階成

國公朱希忠等率羣臣上表稱賀雲雨應期 上喜批

蒼天慈垂鑒大澤應祈朕心感仰 十二月旱風霾言

官請計京官林潤復劾鄔懋卿五罪 上命削爵

穆宗隆慶二年六月浙江福建四川陝西淮安鳳陽等處

大旱

今上萬曆十六年蘇松等處大旱 十七年蘇松又旱

二十四年閏八月浙江巡撫劉元霖奏杭嘉湖三府自五月以來旱魃爲害禾苗失種秋成無望 二十九年五月初六日禮部奏二月至今畿輔內外半年不雨土脉焦枯河井乾涸二麥盡槁巡按何爾捷奏阜平縣丈水洞礮夫張世誠饑餓將自己六歲小孩殺死煮食請自五月初六日爲始仍各青衣角帶于本衙辦事宿歇致齋益加虔惕諸司照例停刑禁屠五日遣官恭詣天地社稷山川風雲雷雨等壇黑龍潭廟祝文祭品行各該衙門撰述備辦仍行順天府官督率所屬于應祀

神廟竭誠祈禱奉 旨今歲旱暵異常雨澤未澍朕在

宮中密禱夙夜惶惶依擬着百官再加修省務期感格

祭告 南郊遣公徐文壁 北郊侯陳良弼山川尚書

李戴社稷尚書陳渠風雲雷雨等壇侍郎馮琦黑龍潭廟真人張國祥各竭虔行禮仍行順天府官率屬祈禱

恒燠

金世宗大定二十九年

時章宗已卽位冬無雪

元世祖至元十三年冬無雪

皇明

武宗正德七年冬燕趙河朔之地無雪而燠

恒寒

遼太宗會同二年六月丁丑雨雪

興宗重熙十六年二月大雪

道宗咸熙八年十二月丙辰大雪許民樵採禁地 太康

八年九月大風雪牛馬多歿 九年四月大雪平地丈

餘馬死者十六七 太安三年正月大雪

天祚帝乾統二年三月大寒水復合 九年七月隕霜殺

稼

金熙宗皇統二年三月辛丑大雪 正隆四年十一月庚

寅霜附冰

世宗大定四年正月如安州大雪詔扈從人舍民家者人

支錢一千與其主

章宗承安五年十月癸卯晨陰霜附冰至日入亦如之

宣宗興定五年十二月丁丑霜附冰

哀宗正大三年春大寒 四年八月癸亥風霜隕禾皆盡

五年春大寒 二月雷雨雪木之華者皆敗 天興

元年正月丁酉大雪 二月癸丑又雪戊午又雪 五

月大寒如冬是時鈞州陽邑盧氏兵皆敗

元

世祖中統二年五月西京隕霜殺禾 三年五月宣德咸

寧等路隕霜 八月河間平灤等路隕霜害稼 四年

四月武州隕霜殺麥禾 至元八年七月昌會蘭等州

隕霜殺稼 十七年四月海寧益都四郡隕霜損桑

二十一年三月山東隕霜殺蠶盡死被災者三萬餘家
二十六年五月丁丑濟南棣州隕霜殺菽 二十七
年七月大同平陽太原隕霜殺禾 二十九年三月濟
南般陽等郡及恩州屬縣隕霜殺桑

成宗元貞二年八月金復州隕霜殺禾 大德五年二月

湯陰縣隕霜殺麥 五月商州隕霜殺麥 六年大同

太原隕霜殺禾 七年四月隕霜殺麥 八年三月濟

陽灤城隕霜殺桑 八月隕霜殺稼 九年三月河間

益都般陽三郡屬縣隕霜殺桑一百四十一萬七千餘

本壞蠶一萬二千七百餘箔 十年七月大同渾源縣

隕霜殺禾 八月綏德州米脂縣隕霜殺禾二百八十

頃 至大元年大名路隕霜殺桑 八月大同隕霜殺

禾

仁宗皇慶二年三月濟寧隕霜殺桑 延佑元年三月東

平般陽等郡泰安曹濮等州大雨雪三日隕霜殺桑

閏二月濟寧汴梁等路及隴州開州清城涇源諸縣隕

霜殺桑無蚕 七月冀寧隕霜殺稼 四年夏六月盤

山隕霜殺稼五百餘頃 五年五月雄德歸信縣隕霜

殺桑 七年八月益津縣雨黑霜

英宗至治三年七月冀寧曲陽縣大同縣興和路咸寧縣

隕霜殺禾 八月表州宜春縣隕霜害稼

泰定帝泰定二年三月雲府大雪民饑

文宗天曆三年二月京師大霜晝霧 至順元年閏七月
奉元西湖州寧夏應理州鳴沙州鞏昌靜寧邠會等州
鳳翔麟遊大同山陰晉寧潞城隰川等縣隕霜殺稼

順帝元統三年三月壬辰河州大雪十日深八尺馬駝牛
羊凍死者十九民大饑 至正六年六月達達地大風
雪羊馬皆死 九月彰德雨雪結凍如琉璃 七年八

月衛輝隕霜殺稼 九年三月温州大雪 十年春彰
德大寒近清明節雨雪三尺民多凍餒而死 十一年
三月汴梁路鈞州大雷雨雪高密縣平地雪深三尺餘

十三年秋邵武光澤縣隕霜殺稼 二十三年三月
東平路須城東阿穀陽三縣隕霜殺桑廢蚕事 八月

鈞州密縣隕霜殺菽 二十七年三月彰德大雪寒甚
於冬民多凍死 五月辛巳大同隕霜殺麥 秋冀寧
路徐溝介休二縣雨雪 十二月奉元路咸寧縣井水

冰合 二十八年四月奉元隕霜殺菽

皇明
憲宗成化十三年七月陝西鞏昌平涼諸州縣隕霜殺稼
武宗正德七年冬江淮風雪連旬南至洞庭緩流處冰厚
尺餘

今上萬曆六年十一月大雪浹旬民多凍死 二十三年
冬十二月至正月江南雪久殍尸無筭
續文獻通考卷之二百二十二終

續文獻通考卷之二百二十三

皇明進士雲間王圻纂輯

物異考 冰雹至人異

冰雹

宋

寧宗嘉定十五年九月雷大雨雹

理宗紹定元年五月丁酉雨雹 五年七月甲辰雨雹

端平二年五月丙申雨雹 三年七月大雨雹 景定

元年正月庚申雨雹 二年六月丙午雨雹 嘉熙三

年三月癸巳雨雹 寶祐四年二月戊午雨雹

時吳昌裔論四陰證狀其畧曰竊見立秋以來常陰為

彙文獻通考 卷之二百三十三
疹先一日大雨雹越翼日暴風至淫雨不止至於旬時
蚤禾壞於垂成晚稻傷於旣穎豐稼之候轉而凶荒將
恐害於糝盛無以供我軍實又聞天目一帶洪浸漂流
水冑近畿是殆爲兵爲饑之證占書曰雨雹陰脅陽也
淫雨陰干陽也方金火之交而厥罰常雨此非陰盛陽
微之兆乎夫臣者君之陰也妻者夫之陰也小人者君
子之陰也夷狄者中國之陰也且自聖上攬權之後固
無昔日擅命之臣惟威令積弱不能以運掉三邊紀綱
寢頹不能以操制諸將習强者方命怙寵者玩威第功
賞者多肆於誕誣報軍書者輒輕於狎侮偏禪擅離部
伍而不知有國法士卒敢陵州縣而不知有朝廷積是

弱形漸不可長此非將帥之權太盛乎方國步艱難之
日正君心恐懼之時而道路流言竊議聖德謂宮廷宴
飲頻爲過差房闈妃嬪多著位號知書近侍以竒功而
移上意私謁羸民以險陂而通外交甚至外廷之除授
或倚於幽陰帥柄之請求輒通於中禁牽於柔道職是
厲階此非女寵之謁太盛乎端平人才之盛藹然有小
元祐之風不一二年初意漸變君子則厭薄以爲無益
小人則愛惜以爲有才三凶囑托以潛歸二孽覬覦而
再起不惟昔之所斥者復乘隙以求進而今之所擯者
亦旋踵而得遷旁起多門自塞正路此非舊人復用之
漸乎韃虜憑凌中夏蓋非殘金之比初犯蜀口五郡爲

墟繼犯荆襄十州如燬將士征行而不得卧婦子流徙
而不得歸欲戰則恐事力之不強欲和則慮情款之未
實又况唐鄧均睦之寇導之以扣江秦鞏松維之族誘
之以幹腹內外受敵殊可寒心此非夷狄竊發之證乎
凡此四端是皆陰類事形於下則變見於天證象孔昭
警戒甚至陛下代天作子者也所宜昭德塞違以回渝
怒之威大臣佐理陰陽者也所宜開誠布公以消乖沴
之氣陽明勝則德性用陰濁勝則物欲行消長之機正
宜凜凜今大昕坐朝間有時不視事之文私第謁假或
有時不入堂之報上有耽樂惰逸之漸下無協恭和衷
之風在內則嬖御懷私以爲君心之蠹在外則弟子寡

謹以爲朝政之累游言導俗寵賂彰聞欲以此銷鑠群
慝呼吸太和得乎昔建炎三年六月陰雨不止高宗罪
已求言宰執引咎求去郎官以上皆許言朝政得失時
中書舍人李陵以三陰之說應詔謂能制將帥之謂剛
能抑宦寺之謂正御史中丞張守亦以三陰之說抗疏
願嚴恭寅畏以脩其德更選任輔弼以脩其政上下動
色祗畏明威卒扶炎精之光以基中興之盛皆自高宗
君相一念抑畏中來也臣愚欲望陛下仰繩祖訓顧諟
天明遠聲色戢宦寺以清宅心之源進忠良斥姦回以
公用人之柄申明典章以重御將之法謹固封守以嚴
備敵之防而二三大臣各一乃心各和乃政通宮中府

中爲一體毋使陟罰之異同合在邊在廷爲一家毋使細大之偏重如此君臣合德中外革心未有不轉災青而休祥易陰蒙而陽霽天下事變亦當陰消潛弭而不足憂矣

虞儔應詔上封事曰臣聞陽奮則爲雷爲電陰凝則爲雹爲雪方陰陽之相薄則雷雹皆至及陽爲陰所勝則雷止而雪作魯隱公九年三月自癸酉大雨震雷至庚辰大雨雪凡八日劉向以爲周三月今正月也雷電未可以發旣發則雪不當復降是皆失節故謂之異吳太平二年三月甲寅大雨震電至乙卯大雨雪纔二日耳史臣以爲先震電而後雨雪陰見間隙起而勝陽其後

禍亂之應有若符節往牒具載良可畏也今正歲之始建寅之月三陽用事於卦爲泰自戊寅之庚申雷電雪雹俱作於三日之間視魯則數視吳則踈臣願陛下以往事之驗爲方來之鑒憂懼脩省以答上天仁愛之意則災異塞於上禍亂伏於下在陛下一念之頃耳臣又聞朝廷者陽也宮禁者陰也日昱乎晝月昱乎夜而寒暑成天子理陽道后治陰德而後國家理若宮禁之中宴飲之不節則非所以崇慈聖躬賜予之不省則將至於空虛內藏女謁行乎內權勢行乎外尤不可不防其微而杜其漸也有一於此則雷雪之變乃上帝所叮嚀陛下之意也不求之身是無應天之實天怒愈深矣至

於勲戚貴近時有濫賞倡優伎藝每蒙宣引宮門啓閉
多不以時豈所謂嚴等威肅宸居哉臣願陛下畏天之
威謹正始之道宗社幸甚臣又聞君子者陽也小人者
陰也自古君子小人勢不兩立君子在內小人在外於
卦爲泰小人在內君子在外於卦爲否今朝廷清明多
士濟濟有官守者修其職有言職者盡其忠乃建寅之
月三陽在內宜泰而否意者在外小人交結黨與潛謀
進用如某人輩臣願陛下觀拔茅連茹之象以進君子
戒履霜堅冰之漸以退小人毋使鴟鸞並棲薰蕕共器
則天意解矣臣又聞中國者陽也夷狄者陰也自古夷
狄之強弱常係中國之盛衰今國家南度甲子已逾一
周胡運將終朝野咸意中原可復近者邊報傳聞信否
雖未可知第講和日久邊備廢弛意者將有好雄潛萌
不肖之心窺伺間隙或恐讐耻未復而唇齒先寒侯景
之事可爲深慮臣願陛下明詔大臣遴選逐路帥臣俾
之先事經理以備不虞

遼聖宗統和十六年雨水冰

天祚帝乾統三年七月中京雨雹傷稼

金海陵天德三年十二月巳丑雨水冰

世宗大定八年二月甲子北望淀雨雹廣十里長六十里

十一年六月戊申西南路招討司必里海水之地雨

雹三十餘里小者如雞卵其一最大廣三尺長丈餘四

五日始消 二十三年五月雷雨雹

章宗承安二年六月丙午雨雹 四年三月戊午雨雹

泰和四年正月壬申雨水冰 十一月丁卯雨水冰凡

三日 八年四月甲午雨雹

宣宗貞祐元年十二月乙卯雨水冰 二年十二月巳酉

雨水冰 興定元年四月單州雨雹傷禾 五月延州

原武縣雹傷稼 三年十二月壬申雨水冰

哀宗正大二年四月京畿大雨雹 五年四月鄭州大雨

雹桑柘皆枯

元世祖中統二年四月雨雹大如彈丸 三年五月順天

平陽真定河南等郡雨雹 四年七月燕京昌平縣景

州裕縣開平路興松雲三州俱雨雹害稼 至元二年

八月彰德大名南京河南濟南太原等郡雨雹 四年

三月夏津縣大雨雹五月衛地大雨雹六月中山大雨

雹 五年六月中山大雨雹 六年二月興國雨雹大

如馬首殺禽獸七月西京大同縣雨雹 七年五月河

內縣大雨雹 十二年十二月巳亥雨水冰 十五年

閏十一月海州贛榆縣雨雹傷稼 十六年保定等二

十餘路雨雹害稼 十九年八月雨雹大如雞卵 二

十年四月河南雨雹害稼 五月安西路風雷雨雹

八月真定元氏縣大風雹禾盡損 二十二年七月冠

州雨雹 二十四年西京北京隆興平樂南陽懷孟等

路雨雹害稼鞏昌雨雹 九月大定金原高州武平興

中等處雨雹 二十五年三月靈壁虹縣雨雹如雞卵

害麥 十二月靈壽陽曲天成等縣雨雹 二十六年

夏平陽大同保安等郡大雨雹 二十七年四月靈壽

縣大風雹 六月棣州厭次縣大風雹傷禾黍菽麥桑

棗 二十九年閏六月遼陽瀋州廣寧開元等路雨雹

三十年真定寧晉雨雹 三十一年四月卽墨縣雨

雹 七月棣州陽信縣雨雹真定路南宮新河縣雨雹

八月德州德安縣雨雹大風

成宗元貞元年五月鞏昌金州會州西和州雨雹無麥禾

七月隆興路雨雹 二年五月河中猗氏縣雨雹 六

月隆興咸寧縣順德邢臺縣太原交河離石壽陽等縣

雨雹 八月懷孟武陟縣雨雹 大德元年六月太原

崞州雨雹害稼 二年二月檀州雨雹 八月彰德安

陽縣雨雹 四年三月宣州涇縣台州臨海縣大風雹

五年七月暴風起東北雨雹兼發江河泛溢自通泰

崇明至鎮州民被災死者不可勝計 七年十一月雨

木冰 八年五月大寧路建州蔚州靈仙縣雨雹太原

大同隆興屬縣陽曲天成懷安白登風雹害稼 八月

營州嵐州交城陽曲懷仁等縣雨雹 九年六月晉寧

冀寧宣德隆興太寧等郡大雨雹害稼 十年四月鄭

州管城縣風雹大如雞卵積厚五寸 五月大雨雹

續文獻通考 卷之二百二十三 二四、四十四

七月宣德縣雨雹 十一年五月建州雨雹

武宗至大元年四月般陽新城縣濟南厭次縣益都高苑

縣風雹 五月管城縣大雹深一丈無麥禾 八月大

寧縣雨雹害稼斃畜牧 二年三月濟雲定陶等縣雨

雹 六月崞州源州金城縣雨雹延安神木縣大雹一

百餘里擊死人畜 三年四月靈壽平陰等縣雨雹

四年四月南陽雨雹 閏七月宣寧路雨雹

仁宗皇慶元年四月大名濬州彰德安陽縣河南孟津縣

雨雹 六月開元路風雹害稼 三年七月冀寧平定

州雨雹景州阜城縣風雹 八月大同懷仁縣雨雹

延祐元年五月虜施縣大風雹損稼并傷人畜 六月

宣平仁壽白登等縣雨雹 二年五月大同宣德等郡

雷雹害稼 三年五月薊州雹深一尺 五年四月鳳

翔府雹傷麥禾 六年六月大同縣雨雹大如雞卵

七月鞏昌隴西縣雹害稼 七年八月大同路風雷雨

雹

英宗至治元年六月武州雨雹害稼永平路大雹深一尺

害稼 七月真定順德等郡雨雹 二年四月涇州涇

川縣雨雹 六月思州大風雨雹 三年五月大風雨

雹拔柳林行宮大木三千餘株

泰定帝泰定元年五月冀寧陽曲縣雨雹傷稼思州龍泉

縣雨雹傷麥 六月順元太平軍定西州雨雹 七月

龍慶路雨雹大如雞卵平地深三尺餘 八月大同白
登縣雨雹 二年四月奉元白水縣雨雹 五月洮州
路可當縣臨洮府狄邑縣雨雹 六月興州郿州及成
紀通渭白水虜施安塞等縣雨雹 七月檀州雨雹
三年六月鞏昌路大雨雹中山府安喜縣乾州永壽縣
雨雹 七月房山寶坻玉田永平等縣大風雹折木損
稼 八月龍慶路雨雹一尺大風損稼 四年六月中
山府雨雹 七月彰德湯陰縣冀寧定襄縣大同武應
二州雨雹害稼 致和元年四月濬州涇州大雹傷麥
禾 五月冀寧陽曲縣威州井陘縣大雨雹 六月涇
州湯陰等縣大雨雹大寧永平屬縣大雨雹

文宗天曆二年七月大寧惠州雨雹 八月冀寧陽曲縣

大雹如雞卵害稼 二年七月順州東安州及平棘肥

鄉曲陽行唐等縣風雹害稼開元路雨雹 至順元年

七月平棘行唐二縣雨雹傷稼 二年十二月冀寧清

源縣雨雹丁巳雨木冰癸亥又雨木冰 三年五月甘

州雨雹

順帝元統元年三月紹興蕭山縣大風雨雹拔木仆屋殺

麻麥斃人民 二年三月塞北東涼亭雨雹 至元元

年七月西和州徽州雨雹 二年八月高郵寶應縣大

雨雹是時淮浙皆旱惟本縣瀕河田禾可刈悉爲雹所

害凡田之旱者無一雹及之 四年四月清州八里塘

雨雹大過於拳其狀有如龜者有如小兒形者有如獅
象者有如環玦者或長如卵或圓如彈玲瓏有竅色如
雪而堅 五年十一月瑞州路新昌州雨水明年二月
冰始解 至正二年五月東平路東阿縣雨雹大者如
馬首 四年正月汴梁路鄭州尉氏洧川河陰三縣及
龍興靜安縣雨水 六月東平陽穀縣雨雹 六年二
月興國縣雨雹大如馬首小者如雞卵斃禽畜甚多
五月絳州雨雹大者二尺餘 八年四月鈞州密縣雨
雹大者如雞子傷麥禾龍興奉新縣大雨雹傷禾折木
八月益都臨菑縣雨雹大如盃盃野無青草赤地如
赭 九年二月龍興大雨雹 十年五月汾州平遙縣

雨雹 十一年四月彰德雨雹大者如斧時麥熟將刈

頃刻忘失田疇堅如築塲無稽粒遺留者地廣三十里
長百餘里樹木皆如斧所劈傷行人斃禽畜甚衆 十

二年五月文水縣雨雹 九月冀寧保德雨水 十三

年四月益都高苑縣雨雹傷麥禾及桑 十四年正月

汴河水皆成五色花草三日方解 六月薊州雨雹

十七年四月濟南大風雨雹 十九年四月莒州蒙陰

縣雨雹 五月通州及益都臨胸縣雨雹害稼 二十

年五月薊州遵化縣雨雹終日 二十一年五月東平

雨雹害稼 二十二年八月南雄雨雹如桃李實 二

十三年五月鄆州宜君縣雨雹大如雞子損豆麥 七

月京師及隰州永和縣大雨雹害稼 二十五年五月
東昌聊城縣雨雹大者如拳小者如雞子二麥不登
二十六年六月汾州平遙縣雨雹 二十七年二月永
州大雨雹 五月益都大雷雨雹 七月冀寧徐溝縣
大風雨雹拔木害稼 二十八年正月慶陽府雨雹大
如盂小如彈丸平地厚尺餘殺苗稼斃禽獸 二月汴
梁雨木冰狀如樓閣人物冠帶鳥獸花卉百態具備羽
幢朱葆彌望不絕凡五日始解又十日復冰自汴至平
樂皆然不一歲賊陷汴據之

皇明

成祖永樂十二年十一月金水河及太液池冰凝具樓閣

龍鳳花卉之狀奇巧特異 上賜群臣觀之呂震以爲

禎祥屢見率百官上表賀不許

景皇帝景泰五年春京師大雹 詔求直言御史鍾同疏

請朝 兩宮復 太子下廷臣議會禮部郎中章綸亦

上疏 上怒逮綸考掠詞連同弁炮烙刑逼認通謀

南內終不服會大風雨沙下禁錮獄中復封巨挺六擇

六壯士杖之竟斃

憲宗成化五年閏二月癸未廣東瓊山縣雨雹大如斗

八年七月丙午陝西隴州大風雨雹中有如牛者五長

七八尺厚三四寸六日方消 二十年三月甲申江西

新建豐城高安三縣大風雨雷雹壞民舍宇民多壓死

孝宗弘治元年戊申夏四月天壽山大風雨雹

武宗正德十二年秋九月 上幸大同獵陽和雨雹星隕

世宗嘉靖五年七月朔江西南豐縣雹大如碗形如人頭

萬全都司雹大如甌入地尺許 十七年戊戌夏四月

八日吳城雨冰雹是日未刻忽烈風迅雷冰雹如注其

大如李中有一竅而四圍皆紋至西陽山一境又大如

斗途人不及抵室或有中其頂及耳而傷者蓋亦有至

死者 三十五年山東沂州雹大如孟小如雞子平地

尺餘經八里人畜傷死無筭 三十七年閏七月淳化

諸縣雨雹 三十九年六月初二泗川茂州大雪雹

秋七月初三茂州又大雹

穆宗隆慶元年五月大同大雨雹 七月紫荆關雨雹殺

秋稼七十里 四月萬全都司大風雷雨雹 二年正

月二十四日未時遵化縣有黑雲忽起雨冰雹小者如

彈丸大者如雞子須臾滿地 夏四月初五卯時萬全

都司及左右二衛葛峪深井等處白晝晦冥雨雹壅至

大者如杯卵小者如棗栗牛羊有被傷者二十六日大

同廣昌縣韓村周村馮村賈村三家村浮圖峪木積山

等處雨雹大如卵 四年四月宣府大同等處雨雹厚

二尺餘大如雞卵禾苗盡傷 五月山東膠州臨朐夏

津等縣雨雹損稼 七月直隸井陘縣大雨雹至辛酉

雷擊 圓丘廣利門鳴吻御史王喬桂疏乞修省 五

年四月京師大雨雹五月宣府馬營堡等處大雨雹
常寧等堡大雨雹獨石大雨雹 六年四月昌平州大
風雷雨雹

今上萬曆三年十一月十一日京師木冰 十二年夏五
月蘇州松江等處大雨冰雹殺傷禾苗花豆不可勝計
二十三年八月十五日寧遠地方冰雹大如雞卵打
滅序馬田禾等物 二十八年六月山東巡撫劉易從
戰於州府濰縣于四月十五日天降驟雨冰雹大作形
如卵平地水深尺餘將所種大小麥苗并粟穀等項
盡行傷壓無存打死男婦王立兒等十名口牛馱不計
其數又兗州府鄆城縣地方東西長五十里南北濶七

八里于二十三日未時大風自西北起拔樹飛瓦大雨
如注冰雹如拳如斧如卵雜下有二時辰打死牧童趙
差兒等十二名牲畜驢羊共五十九頭倒毀民居五百
餘間二麥花禾皆爲齏粉又濟南府淄川縣于二十四
日冰雹如卵如碗怪風震雷黑氣冲天磚瓦飄空人皆
抱頭閉戶頃刻間將廟宇司館士民房屋石墻牌坊盡
行毀壞壓死多命大甕七個被風飄去離城五里不損
毀壞民房三千四百七十五間壓死男婦劉溱等十二
名被傷男婦王可智等六十名倒石坊六座廟宇司舖
公署十四處打傷麥田二百九十六頃八十九畝 二
十九年延綏榆林二衛所八月雪雹相繼禾苗盡死

恒風

宋寧宗嘉定六年興國大風壞戰艦六十餘 十年春正月大風十一月如之 十三年大風 十六年鄂州大風壞戰艦三百餘 十七年鄂州暴風壞戰艦二百餘 理宗寶慶二年七月大風 景定四年颶風 遼聖宗開泰六年六月大風起於蕭德妃塚上晝晦 七年五月品打魯塊部節度使字羅申至鼻洒河遇微風 忽天地晦冥大風飄四十三人飛旋空中良久乃墮數里外字羅申幸獲免一壺酒在地乃不移 十三年蕭惠隨車駕征夏元昊邀元昊走路迎擊大風忽起飛沙眯目軍亂夏人乘之蹂踐而死者不可勝計詔班師

興宗重熙二十四年張孝傑及弟詣佛寺忽迅風吹孝傑幘頭與浮圖齊墮地而碎有老僧曰此人必驟貴然亦不得其死後果如所言

天祚帝乾統六年王鼎宰漆水縣時憇於庭忽有暴風舉卧榻空中鼎無懼色但覺枕榻俱高乃曰吾中朝正士邪無干正可徐寘之須臾榻復故處風遂止

金

太祖初起兵時遇遼兵於出河店會大風起塵埃蔽天乘風勢擊之遼兵潰走

熙宗皇統九年四月京師大風雨龍聞榆林河大風壞民居官舍瓦木人畜皆飄颺十數里死傷者數百人同知

州事石抹里壓死

海陵正隆五年二月鎮戎德順軍大風壞廬舍人多壓死
六年六月夜大風壞承天門鴟尾

世宗大定四年七月大風拔木雷雨 八年二月北望淀
大風 太和三年十月大風 四年三月大風毀宣陽
門鴟尾

衛紹王大安三年二月夜大風從西北來發屋折木吹清
夷關折時有男子郝贊詣省言上卽位之後天變屢見
火焚萬家風折門關非小異也宜退位讓有德有司問
爾狂疾乎贊大言曰我不狂疾但爲社稷計宰相皆非
其才每日省前大呼凡半月上怒誅之隱處 崇慶元

年七月有風從東來吹帛一段高數十丈宛轉如龍墮
於拱辰門內

宣宗貞祐三年二月大風龍德殿鴟尾壞 興定三年四
月大風吹河南府署飛百餘步戶案門鑰開文牘飄散
不知所在

哀宗正大元年正月初視朝大風飄端門瓦昏霾不見日
黃氣塞天 四年八月大風吹左掖門鴟尾墮丹鳳門
扉壞

元

太宗五年十二月大風霾凡七晝夜

憲宗六年春大風起西北砂礫飛揚白日晦暝

世祖至元八年十月檀順等州風潦害稼 十六年保定
 等二十餘路大風害稼 二十四年西京北京隆興平
 樂南陽懷孟等路大風 二十五年正月汴梁延津封
 丘二縣大風麥苗盡拔 三十一年七月棣州大風發
 屋拔木
 成宗元貞二年順德大風損麥 大德十年二月大同路
 暴風大雪壞民廬舍

武宗至大元年秋歸德暴風
 仁宗皇慶二年秋八月大風海溢 延祐七年八月延津
 縣大風晝晦桑隕者十八九
 英宗至治元年三月大同路大風走沙土壅沒麥田一百

餘頃 三年三月衛輝路大風桑彫蚕死

泰定帝泰定元年四月大風 八月二十七日夜永嘉颶
 風大作地震海溢入城溺民居樂清尤甚 三年七月
 寶坻房山二縣大風折木 八月大都昌平等縣大風
 一晝夜壞民居九百餘家 四年五月衛輝路大風九
 日禾盡偃

文宗天曆二年二月胙城新鄉縣大風 至順元年秋七
 月平棘行唐縣大風 二年五月柳林行宮大風拔木
 三千七百株

順帝至元二年陝西暴風 至正元年七月廣西雷州颶
 風大作湧潮水拔木害稼 二年十月海州颶風大作

海水漲溢溺死人民 四年七月温州颶風大作地震
海溢民居漂蕩溺死者衆 十三年五月潯州颶風大
作壞官舍民居瓦屋門扉皆飄揚七十里外 十四年
七月潯州襄垣縣大風拔木偃禾 十六年温州大風
海舟吹上平陸高坡二三十里死者千數 二十一年
正月石州大風拔木六畜皆鳴 二十四年台州路黃
岩州海溢颶風拔木悉盡偃 二十七年三月京師有
大風起自西北飛沙揚礫昏塵蔽天逾時風勢八面俱
至終夜不止如是者連日自後每日寅時風起萬竅爭
鳴戍時方息至五月癸未乃止三月丁丑朔萊州大風
庚子京師大風

皇明

英宗天順八年五月五日大風雹飄瓦拔木壞郊壇
憲宗成化五年二月己未雨霾天氣昏蒙黃塵四塞
卯日變白土霾氣四塞 六年三月陝西寧夏大風揚
沙黃霧四塞 四月庚戌立夏雷未發聲陰霾四塞
七年四月乙卯雨土風霾 十二年南京陰霾蔽日
孝宗弘治元年戊申夏四月天壽山大風雹
武宗正德五年六月京師風霾 十一年五月風霾大旱
十四年三月京師風霾

世宗嘉靖五年禮部尚書席春奏近來大風捲廟宇及民
舍百餘家了無踪跡 四十一年冬十一月乙未朔有

暴風自北起 上諭兵火當慎 命兵部移檄諸邊詰
戎兵以戒不虞 十二月京師大風占者云應在土功
工部尚書雷禮請築重城 上曰費且巨萬守之尤難
姑已之 四十三年正月丁丑大風 上命本兵速移
檄警備 三月望異風作赤黃霾是日風作至二十一
日不止 世宗傳諭內閣徐階等曰土風雨霾不止勿
待原期着明日始致齋如例停封禁屠凡三日
穆宗隆慶二年元旦大風飛沙走石白晝晦暝自京師達
江浙皆然 三月京師大風揚塵四塞 是年戊辰元
旦南京大風拔木揚沙上新河泊舟盡漂溺其風起已
至未乃息

今上萬曆二十八年福建巡撫金學曾奏興化府莆田縣
于七月十八日至二十二日怪風大雨連作五晝夜走
石飛沙公私廨舍城垣橋梁堤岸阡陌蕩然傾圮衙門
廟道府州衛縣各館墻垣盡行倒塌聖殿啓聖祠文昌
宮敬一亭兩齋各祠倒塌無存倉廩則預備大有等倉
殿館驛祠壇則吉了巡司并新驛養濟院社稷山川壇
官房皆已淹倒鹹水灌入田禾悉枯海濱東角各堤俱
衝壞廣業里常泰里田流去一百五十餘畝新興賓大
等里不下千畝孝義仁德南方等里七百四十餘畝淹
沒已盡 福州府連江縣于十六七日颶風從西南起
飛瓦拔木十八日大雨傾盆連三晝夜至二十日辰時

狂潮湧注入城水深丈餘官舍民廬城垣塌潰者十之七八縣墻盡圯倉廩水浸三尺卷房倒塌冊籍隨波聖宮鼓樓公館無存至二十二日水勢稍平臨安一帶地當水衝房屋傾壞人民傷殘難以枚舉 福安縣于七月十八日起至二十一日颶風淫雨大作洶湧洪水滄沒田禾傾倒民房無數

恒陰

遼道宗咸雍八年正月昏霧連日

章宗承安五年十月天久陰是日雲色黃而風霾 泰和四年正月陰霧

元大德十年二月大同路雨沙陰霾

皇明

太祖洪武十八年春二月久雨陰晦不解雪雹而雷遂

詔中外百司凡軍民利病政事得失條陳以對下及編民卒伍苟有所見皆得盡言無諱

景皇帝景泰五年正月積雪恒陰

晝晦

遼太宗會同八年三月圍晉於白團衛村大風晝晦如夜 晉符彥卿以萬騎橫擊遼軍遼軍不利乃歸

金世宗大定五年十一月大霧晝晦

章宗明昌六年二月京師大雨雹晝晦

宣宗貞祐元年八月夜將曙大霧蒼黑跬步無所見至辰

已時乃散 九月元妃淑妃王氏受封大風昏霾黃色
充塞天地 十三年十月夜西北有霧氣如積土至二更
方散 興定四年正月晝晦有頃大雷風雨

元成宗大德五年七月晝晦

泰定帝泰定四年碣門晝晦

文宗天曆二年八月晝晦自庚子至丙午皆晝霧夜晴

順帝至元四年京師晝晦時荊州分域有鬼夜叫云苦也

苦幾時泥到襄陽府及早視之凡樹木皆用泥和猪狗

血泥之 至正十七年秋七月京師晝晦不辨人物自

旦至午方消如是者旬有五日 二十一年四月朔日

未沒三四竿許忽然無光漸漸作蕉葉樣天昏黑如夜

星斗燦然飯頃方復舊天再開朗星斗亦隱又少時日

乃沒

按王隱晉書曰日無光臣有陰謀京房易傳曰臣專刑

茲謂分威蒙微而日不明

二十七年二月永州晝晦城中人舉燈而食鷄棲於墀

踰時方明 庚子京師晝晦 六月丙午日食晝晦

皇明

景皇帝景泰元年庚午閏正月京師烈風晝晦 五年甲

戌京師黃沙四塞晝晦時章綸鍾同下獄 六年春二

月二十八日風作黃沙蔽日連晝晦暝至三月初八日

既雨始霽先是二月二十八日清明後之二日旦時微

風自西北來至辰刻漸大沙土潏然東驚其色正黃如
柘染然土沾人手面洒洒然如濕頃之天地晦暝色映
窓牖間如血紅室中不辨人已而紅色漸黯黑至午未
復黃稍開朗人相顧慘愕至三月二日微雨後忽黃氣
四塞日色如青銅無風而雨土拂之如塵積地皆黃色
昏益甚明日大雨時或紅黑至初六日始作東北風七
日又雨八日始霽人心乃安

憲宗成化九年春三月山東晝晦

孝宗弘治十五年壬戌冬十一月雲南晝晦

武宗正德十四年己卯春京師風霾晝晦水溢

世宗嘉靖八年春正月戊戌朔風霾晦如夕 九年三月

京師大風晝晦

雷震

宋

寧宗嘉定十四年正月地震大雷是春金虜入寇斬黃二

州時彭龜年奏曰天之鼓舞萬物者雷風也君子鼓舞
萬民者號令也天有雷風之變乃爲人君號令之應雷
爲天地之動最爲不測而難信者然發以二月收以八
月人事候之以爲節未嘗爽也故萬物因之以動蟄而
無病焉若當收而發則誤物多矣陛下亦嘗因雷之非
時而反求之號令之間乎陛下自卽位以來好出御筆
陞黜之間多爲不測若示人以聰明威斷者其慰人心

者固時有之而動人心者亦不少矣抑思人君據天下
之利勢一喜一怒係萬物休戚而使人不可得而測則
人其能自安乎當人情求安之時而反使之有不自安
之意殆非初政之美也司馬光嘗告神宗皇帝曰陛下
好於禁中指揮外事非公卿所薦舉牧伯所糾劾或不
次遷官或無故廢罷外人疑駭不知所從夫公卿牧伯
所糾劾或謂之賢而不賢或謂之有罪而無罪皆有迹
可見責有所歸故不敢大爲欺罔若姦臣密白陛下令
陛下自爲聖意以行之則威福集於私門怨謗歸於陛
下此光體要䟽中語也陛下向在潛邸固最愛此䟽豈
今日乃忘之耶陛下試以光之言平心熟誦反而思之

則今日之舉爲是而爲非可以坐決矣臣故以號令不
測爲陛下之過者此也壽皇聖帝因山之舉國之大事
也始卜稽山大臣以爲土薄復卜赤山太史又以爲不
吉復令卜下宮又以下宮爲不可遷日月以迫而神穴
未定有司應辦蔑知所向此非朝廷之過乎太上皇移
御之所又國之大事也至三易其處使天下聞之莫不
疑惑此又非朝廷之過乎隨龍人推恩陛下卽祚之二
日固嘗有宣諭矣已而大臣擬進至于一再必欲施行
陛下持之不下臣嘗親聞玉音謂朕尚未見父母而先
推恩隨龍人孰爲重孰爲輕有識聞此訓也莫不感嘆
陛下聖明而大臣復請下之使陛下誠心實德不孚於

天下此又非朝廷之過乎惟廟議無一定之規故出令
有二三之惑臣以號令不信爲二三大臣之責者此也
雷震不時應或在是孟冬之月六陰過盛而謂之陽月
者以陰盛則衰陽當生爾今淫雨爲災蓋陰勝也推之
人事則君弱臣強陰勝也內侵外治陰勝也小人害君
子陰勝也盜賊病平民陰勝也蠻夷謀中國陰勝也陛
下受天明命大臣雖有翊戴之勲而威福之柄實在陛
下前日大臣庇一大吏出一臺臣陛下覺之罷大臣而
進臺臣已服陛下英斷君弱臣強之病宜無有也陛下
自在潛邸不邇聲色及登大位親灑宸翰以聲色酒爲
戒旣無所耽溺亦無所牽制內侵外治之患宜無有也

惟是陛下思見太上朝夕不忘而中間有阻絕不得通
求之愈切持之愈固使陛下彷徨無策經營南內將有
移御之意若果如此陛下念親可謂至矣然於宗廟社
稷之計不審孰慮之否乎此恐未免動陰勝之應也天
道雖遠固未易知人心非遙氣到自見自古未有不召
而自至之災亦未有已出而不應之變陛下不可逆料
以爲不然而忽之也推之已事亦可鑒矣陳瑾常謂承
顏養志當以大舜武王爲法入脩家人之禮則恭順無
缺出治朝廷之事則威柄不分此乃大舜武王之所謂
孝也臣願陛下如瑾之言以事其親則內侵外治之患
庶乎他日可以免矣陛下踐祚之日卽以收召人物諭

臣及召命之出莫非負天下物者今在朝之士彬彬固多君子矣然臣嘗密察縉紳之間則多猜防顧忌之心無安舒閑雅之意蓋君臣之情未洽而邪正之路未分陛下信重君子之言未孚於人而昵比小人之迹已見于外君子告陛下之言小人或得與聞而小人告陛下之意君子或不能知正道恐消邪道恐長此亦未免動陰勝之應也當六七月之間淮浙大旱剽掠之徒所至蚘集今雖少弭然饑寒漸近雖朝廷多方軫卹而州縣在在無米失今不圖向後盜賊安保其不作此亦未免動陰勝之應也湖南蠻獠今年侵擾內地已費調護粗得平帖近聞虜人復求疵於言語文移之間我方內虞饑饉之迫豈可外有兵革之釁備禦之策茫如捕風此亦未免動陰勝之應也淫雨爲災應或在是願陛下思所以致災之由求所以弭災之道事事責實不以虛文大要君臣之間各自反己則轉災爲福反沴爲祥直反掌耳惟陛下留神念之

理宗端平三年九月有事於明堂大雨雷震 庚午朝饗太廟雷電 寶祐三年正月迅雷時元夕欲張燈起居郎牟子才上疏言倡優下賤竒技獻笑滌汗清禁今震霆示威願聖明覺悟天意可回乃罷元夕張燈

宋季福州晝錦坊有賣米者一夕雷震死其家三人大書屍上凡九字其文曰朮口月八戾口月八豈人不能

識有一老曰但於其中直貫一畫則成文矣蓋謂米中用水糠中用木查也蓋賣米之家實如是云

遼太宗天顯十二年五月雷震開皇殿

金熙宗皇統九年四月夜大風雨雷電壞寢殿鴟尾

哀宗天興元年九月夜大雷工部尚書蒲乃速震死

元順帝至正二年興國路永興縣雷震死粮房貼書章尹

于縣治時方大早有朱書在其背云有旱却言無旱有

災却道無災未庸殲厥渠魁且擊廷前小吏 七年五

月台州路黃岩縣無雲而雷 十年六月廣西臨桂縣

無雲而雷震死邑民廖璽達 十一年十二月台州大

雨震電 十二年三月寧國路無雲而雷 十三年十

二月汾州雷雨 十四年十二月孝義縣雷雨 十九

年十一月台州大雷電 二十年二月浙西諸郡震霆

掣電雪大如掌頃刻積深尺餘 二十二年十月初五

日大雨雷電

皇明

太祖洪武十三年雷震 謹身殿

英宗正統八年癸亥夏四月雷擊 奉天殿鴟吻 十四

年六月震雷風雨驟作 謹身奉天華蓋殿俱災

景皇帝景泰四年雷擊 奉天殿獸吻 詔求直言翰林

劉球陳時政王振怒之暴死獄中

英宗天順元年丁丑夏五月京師大雷電雨下如注大風

拔木平地水高數尺是夕逮御史張鵬楊瑄并十三道
下錦衣獄都御史耿九疇副都御史羅綺內閣徐有貞
并下獄

憲宗成化三年六月戊申雷震南京 午門正樓科道皆
有言請修省 十三年十一月浙江杭州大雷雨虹見
巡按呂鍾上奏禮部請移文彼處修省 二十三年丁
未夏六月雷震南京 午門

孝宗弘治八年長河江西大震雷

武宗正德元年六月雷震正殿鴟吻 太廟春獸天壇樹
木 禁門房柱俱權折燒毀

世宗嘉靖二年五月初九日雷擊東城各地方旗竿共六
根 十年閏六月雷震 午門西角樓 詔百官修省

十一年十二月二十七日南昌九江等處雷鳴 十
五年五月雷火灼 謹身殿俱燼 上令修省御史何

維栢言 兩宮 山陵之役費且數百萬是誠不可以
已乃沙河之役以七百萬功德亦不下二百萬安南軍
餉非二百萬不可臣恐聚斂者無所施其術而筭計者
安所贍其需乞緩諸不經之費而并力 兩宮安南之
役慎于謀始則民安而天眷矣不報 十八年六月丁
酉雷震左鴟吻毀鼓樓 上命修省 二十四年廣東

雷州府海康遂溪等縣風雨震電有火光如毬自西南
起升至中天星散海潮漲溢壞官民廬舍及人畜田禾

不可勝計天三十四年四月雷始發聲

穆宗隆慶元年八月大暑雷震次日大寒如嚴冬夜半雷

震達旦五年六月二十五日午時雷震 園丘廣利

門鴟吻碎之

今上萬曆十九年五月薊遼總督蹇達奏大榆菱角山百

總金子夙報本月初十日酉時忽然天雷迅烈擊死守

臺兵沈昌并妻張氏揭去四圍臺堞器械等項又喜峰

百總郭文鎮報本月初十酉時天降驟雨霹靂將百總

妻李氏擊死又擊死防守軍士陳龍擊傷軍士李策等

二十三年貴州巡按薛繼茂奏三月十三日貴州地

方雷鳴狂雨大雷打壞田禾 二十五年六月西華門

奉御張用等奏二十五日五更時分本門南吻獸頭被

雷擊碎 七月順天巡撫李願奏本月初一日暮田峪

關雷火燒燬臺器 二十七年閏四月兵科桂有根奏

太廟雷擊槐樹火光直出 巡視中城御史俱祺奏

十三舖宋大綱家被雷擊死三人 貴州撫臣江東之

奏平壤衛地方天黑如夜人目不見狂風大作霹靂雷

霆遍地振動雪雹如碗盆磚石大自西至亥猶擣石而

下

物自鳴

遼太宗大同元年四月次赤岡有聲如雷起於御幄是月

遼王崩

續文獻通考 卷之三十三

聖宗太平五年三月魚兒樂有聲如雷而徙詳見水異類太

平中南院大王耶律制心一日沐浴更衣而卧家人聞
絲竹之聲怪而視之則遠逝矣

金海陵正隆六年臨潢府聞空中有軍馬聲仰視見風雲
杳靄神鬼甲兵蔽天自北而南仍有語促行者未幾海
陵南征遇弑

世宗大定十三年八月策試進士於闕忠寺夜半忽聞音
樂聲起塔上西達於宮考官完顏蒲提李晏等以為文
運始開得賢之兆

哀宗正大五年八月御座上聞若有言者曰不放捨則何
索之不見

元文宗天曆二年五月天鼓鳴於西北七月乙巳天鼓鳴
於東北

順帝至元四年冬江浙行省官立相哥沙不丁輩德政碑
穹窿莫比特缺坐石時若晦者素善誣媚因以楊和王
墳域所有為言役人夫數千拖曳而至畢工之日省中

火爐鳴直至昧爽方休嗣是夜以為常又梟鳴梁壓虎
入城市越明年相哥敗諸人俱罹奇禍 至正十二年
寇起蘄黃將由義興取道犯浙西義興王子明多藏三
代彝鼎又購得一商彝鑿深窖以埋之既入窖彝作牛

鳴者七夜因取出寄田家窖後遭發掘獨此彝得存
十三年十月京師無雲而雷少頃有火墜於東南懷慶

河內縣及懷慶之修武潞州之襄垣縣皆無雲而雷聲震天地 十六年正月嘉興楓涇鎮戴君實門首柳樹若牛鳴者三主人與僕從悉聞之斬其樹不一月苗軍抄掠貨產又兩月屋燬於兵 是歲寒食日海鹽州趙初心率子姪輩詣先隴汎掃松楸忽聞如老鶴作聲憂憂不絕審所在乃是一栢樹頃間衆樹同聲和之一二時方止舉家惶惑至八月苗軍火其居明年六月紅軍掠貨財婦女而姪善如死於難 二十四年四月十五日華亭五保楊巷邵浦雲之西清庵廊屋一十九間每間屋柱皆有聲其聲如以桶覆水面而擊其底者人以手按之則振掉而起經時方止

按乾坤變異錄人君宮室無故有聲王兵起若人家主家亡

二十七年正月絳州聞天鼓鳴其聲如空中戰鬪者

皇明

太祖洪武十一年處州遂昌縣奏有大聲如鐘自天而下無形或以爲鼓妖次年官民俱災 十三年三月貴州布政司使蔣延瓚言去年北征班師 詔至思南府婺川縣大巖山有聲連呼萬歲者三成謂 皇上恩威遠加山川效靈之徵呂震請率群臣上表 上曰人臣事君當以道阿諛取容非賢人君子所爲呼譟山谷空虛之聲相應理或有之布政司官不察以爲祥爾爲國大

臣不能辨其非又欲進表媚朕非君子事君之道也

英宗天順七年二月晦夜空中有聲李賢上言傳云無形

有聲謂之鼓妖上不恤民則有此異 上命具寬恤事

以進

憲宗成化十四年八月戊戌早朝東班官若聞有甲兵聲

者因辟易不成行列衛士爭露刃以備不虞久之始定

命御史詰究莫得其故

武宗正德七年春三月二十三日山東文登縣奏始皇廟

鐘鼓無故自鳴

穆宗隆慶二年三月直隸新城縣空中迅響如雷

今上萬曆二十六年五月西寧古浪城樓大鐘連鳴三陣

二十八年九月鄖陽巡撫鄭國任奏八公署東北角樓

上鐘大鳴三聲

物自壞

金宣宗元光二年丹鳳門壞壓死者數人

元至正十一年岳州府門忽自倒柱脚向天

人異

宋寧宗慶元元年永州民產兒有角翅 時尤溪縣有陳

油妻產二子肢體異而胸膈相連驚異不敢舉 陳升

之將生母荆國夫人常聞排榻有聲者累日索之無所

見既產升之其聲遂息得大蛇蛻于褥下鱗甲首尾俱

備惟腹下脫一鱗升之既長腹亦有一鱗可磨指甲仕

宋封秀國公 楊億之初生母章氏夢羽衣人自言武夷仙脫化既誕則一鶴雛也舉家驚駭貯而棄之江其叔曰吾聞世之異人其生亦異如姜嫄有棄簡狄有契乃追至江濱開視之鶴已脫而嬰兒具焉體猶有紫毳尺餘次日乃落

遼穆宗應曆十二年八月女直進鼻上毛小兒

金世宗大定十三年正月尚書省奏宛平張孝善有子曰合得十二年三月日死至夕復生云本是良鄉人王建子喜兒而喜兒前二年已死建驗以家事能具道之此蓋假屍還魂擬付王建為子上日若是則姦倖小人競生詐偽瀆亂人倫止付孝善

元

世祖中統二年九月河南民王四妻靳氏一產三男

按唐志云物反常為妖陰氣盛則毋道壯也

至元元年四月黃岡民婦生男狗頭 八月武城縣民

王氏妻崔氏一產三男 二年南漳王氏婦一產三男

十年八月鳳翔寶雞縣劉鐵牛妻一產三男 二十

年二月高州張丑妻李氏一產三男一女 四月固安

州王得林妻張氏懷孕五月生一男四手四足員頭三

耳一耳附腦後生而即死具狀有司上之 二十二年

江陵民張二妻鄧氏一產三男 二十八年九月襄陽

南漳縣民李氏妻一產三子

成宗大德元年五月遂寧州軍戶任福妻一產三男 十
一月遼陽打鷹字蘭奚戶那懷妻和里迷一產四男
四年寶應縣民孫奕妻朱氏一產三男 十年正月江
州湖口縣民方丙妻甘氏一產四男

泰定帝泰定元年秦州成紀縣趙思直妻張氏一產三子
致和元年太平當塗縣楊泰妻吳氏一產四子

順帝至元元年雲南廣西婦人俱一產三男祥符縣市中
一丐婦忽生鬚 三年民間謠言拘刷童男女以故婚
姻不問長幼平江蘇達卿時爲上海縣吏有女年十一
贅里人浦仲明之子爲婿明年生一子 至正元年棗
陽縣民張氏婦生男甫及週歲暴長四尺許容貌異常

臍腹擁腫見人輒嬉笑如世俗所畫布袋和尚云 一
十三年霸州民王馬駒妻趙氏一產三男亳州務李閨
妻張氏一產三男

皇明

太祖洪武二十四年八月河南龍門有婦人司牡丹爲夫
蹴死越三年同鄉袁馬頭死而復甦自言我司牡丹也
召其家人驗之良是云死後爲薄姬廟侍婢今借屍還
魂耳時 懿文太子自陝還聞于上 上召面詢 賜
鈔帛還令兩家給養

憲宗成化十八年三月鳳陽宿州民張真妻王氏孕當產
臍下右邊痛不可言歷三月一日腹右畔開裂產出一

男鼻準中有黑痣巡按周蕃聞之朝 甲辰徐州一婦脇骨生一肉瘤漸長如核大皮益瑩薄彌月兒從此產有司具聞月給膳米

世宗嘉靖二年雲南曲靖衛舍人胡晟妻產一男兩頭四手三足 五年禮部尚書席春奏有婦人產一子六目四面頭有角手足各一節獨爪鬼聲 十一年貴州巡按奏軍人李華妻劉氏生男兩頭四手良久身死雷鳴電掣 又當塗縣民吳倫妻一產三男一女 二十八年己酉大同右衛舍人馬錄女年十七歲變爲男子按晉時曾有此異爲中官用事之兆 又華亭橫涇農人孔方忽患腹瘵終日憤憤數月後產一肉塊剖視之乃一孩肢體毛髮悉具而裸處其中

穆宗隆慶二年秋山西男子李原雨有兄原雲兄弟二人原雨初娶張氏夫婦不相能因黜其妻同一夥伴業農一日偶腹痛甚遂卧床久之陽漸微渠亦自異以爲病虛故又久之則月行始知變爲婦人矣或告其兄兄疑之遣其妻往視果然遂告于有司復審果爾因以聞于朝未幾慚恚而死

今上萬曆庚寅南宿州村民婦一產七子膚髮紅白黑青諸色各異以爲妖也潛屬一人瘞之江濟是夜里有富長者夢神謂曰明日有七將軍在阨過爾門宜救之當獲福祐長者起覘門外果見所識人抱一筐衣覆其上

呼而發視之問知其由因呼錢勞之語曰是兒神已托
夢于我我當鞠之爾但歸報已瘞勿洩也越三年婦老
竟無子而思所瘞子翁亦聞育在富長者家徧訪得之
乃屬人懇求長者曰神以兒屬我安有還理于是與見
而兩家子焉

按雙生子曰孿子 永樂靈丘縣民李文秀妻一產三
男 天順間揚州有民婦一產五男至成化間以爭財
訟于巡撫申公異而遣之顧連壁山東博興人與其弟
合壁俱一乳所生其母四乳生六子二女 成化間嘉
善縣鄒亮妻初乳生三子再乳生四子三乳生六子
嘉靖間香山蓮塘民鄭七仔妻廣州河南民黃世綱妻

萬曆間高平縣民吳守倉婦俱一產三男大同有一產
四男者

續文獻通考卷之二百二十三終

續文獻通考卷之二百二十三

卷之二百二十三

續文獻通考卷之二百二十四

皇明進士雲間王圻纂輯

物異考

詩異

至鼠異

詩異

宋寧宗開禧二年鄂州民謠塞上將軍少城南從事多宣
威不可問恢復竟如何後權臣開邊鄂為宣撫使置司
多碎親故幕賓聚城南為酣縱云

金章宗泰和八年有童謠云易水流汴水流百年易過又
休休兩家都好住前後總成留至貞祐中舉國遷汴

衛紹王初即位改元大安四年改曰崇慶既又改曰至寧
有人語曰三年大崇至矣大崇者大虫也俄而有胡沙

虎之變

宣宗貞祐元年衛州有童謠曰團團冬劈半年寒食節沒
人烟明年正月元兵破衛城遂丘墟 興定五年京師
童謠云青山轉轉山青眈誤盡少年人蓋是時人皆為
兵戰鬪山谷轉轉不休當至老也 初南京未破時市
中有一僧不知所從來持一布囊貯棗日日散與市人
所在見童百十從之又有一人拾街上破瓦復以石擊
碎之人皆以為狂不曉其故後乃知其意蓋欲人早散
國家將瓦裂云

元

世祖初宋未下時江南謠言江南若破百鴈來過當時莫
喻其意及宋亡乃知指丞相伯顏也 至元甲子阿合
馬拜中書平章領制國用使司時樂府中盛唱胡十八
小令知識諱者謂其當擅重權十八年人未之信果於
至元壬午伏誅適符其數越五年辛亥桑哥拜中書平
章立尚書省貪暴殘忍更倍於阿合馬人亦謂桑字折
而為四十八桑字後改作相字亦作為四十八竟不知
應之於壽或應之於職然自立省之日至辛卯正月敗
績恰四十八月其神驗如此 張之翰字周卿邯鄲人
嘗除授松江知府自題桃符云雲間太守過三載天下
一元貞第二年是歲病卒果符其讖云 張起字起之四
明人有詩名嘗作一聯云別來越樹長為客看盡吳山

不是家未幾卒殆詩識云

文宗至順二年司徒香山言陶弘景胡笳曲有負辰飛天曆終是甲辰君之語合陛下生年紀號實受命之符乞錄付史館詔翰林集賢諸儒臣議咸謂從山所言恐啓讖諱之端事遂寢

順帝至正五年淮楚間童謠云富漢莫起樓貧漢莫起屋但看羊兒年便是吳家國後我太祖定鼎于吳蓋童謠之應也十年河南北童謠云石人一隻眼挑動黃河天下反及賈魯治河果於黃陵岡得石人一眼而汝穎之變起脩縣有皇舅墓元初卽有謠云皇舅墓門閉運糧向北去水滄墓門開運糧却回來至正十三年

中原大水水退土阜崩墓門顯露自後天下多事海運不通卒如其識十四年春城平江於古城基內得一碑其文云三十六十八子寅卯年至辰巳合收張翼同爲利不在常不在楊切須欸欸細思量且卜水莫問米浮圖倒地莫扶起修古岍重開河軍民拍手笑呵呵日出屋東頭鯉魚山上遊星從月裡過會在午年頭竟不曉所言何事或者以爲三十六四九也張翼巳午之交也張士誠第行九四而同首亂者適十八人也豈其然與方國珍台之黃岩人其居山中曰洋嶼嘗有童謠云洋嶼青出賊精國珍後果叛十五年京師童謠曰一陣黃風一陣沙千里萬里無人家回頭雪消不堪看

三眼和尚弄瞎馬 十六年正月常熟州陷松江府印
造官號給散吏兵佩帶以防奸僞號之製作畫爲圓圈
繞圍皆火焰圈之內一府字以府印印府字上圈之外
四角府官花押民間謠云滿城多是火府官四散躲城
裡無一人紅軍府上座不二月城破悉如所言 三月
彰德路天雨毛如線而綠民謠云天雨線民起怨中原
地事必變 七月彰德路李樹結實如黃瓜民謠云李
生黃瓜民皆無家 八月彰德路雨毛民謠云天雨鼇
事不濟 紅軍初起時旂上一聯云虎賁三千直抵幽
燕之地龍飛九五重開唐宋之天其後毛貴一賊橫行
山東侵犯畿甸駕幸灤京賊勢猖獗無異唐宋 二十
北人作主南人客塔而紅朱衣人作主人公

皇明

太祖洪武五年壬子春三月中書右丞王溥受 命督採
林木至建昌蛇舌巖衆見衣黃衣者歌曰龍蟠虎踞勢
堯堯赤帝重興勝六朝八百年來鍾王氣重華從此繼
唐堯其聲如鐘已忽不見溥以上聞 太祖曰明理者
非鬼怪可惑守正者非讖諱可遷漢之文成五利足以
爲戒事涉妖妄豈可信也

建文君常有詩云是日乘輿看晚晴葱葱佳氣滿京陵禮樂再興龍虎地衣冠重整鳳凰城人以爲文皇識也

訛言

宋寧宗時浙東訛言唵縣有虎神募人捕之

金宣宗貞祐三年六月京城中夜妄相驚逐狼月餘方息元太宗九年左翼部訛言括民女帝怒因括以賜麾下世祖至元十一年誅西京訛言惑衆者

成宗大德六年龍興民訛言括童男女至有殺其子者命捕爲首者三人誅之始息

順帝至元二年民訛言朝廷拘刷童男女一時嫁娶殆盡胡粹中曰人必好色然後疑其淫人必貪財然後疑其盜訛言雖起於閭閻之小人亦在上者露其機括故因以發之耳當時順帝志荒而欲縱聲色之好不待哈麻進秘密而後肆也訛言其必有所自矣

三年民訛言朝廷將采童男女以授韃靼爲奴婢且令父母護送直抵北交割故自中原至於江南凡品官庶人家但有男女年十二三以上便爲婚嫁雖守王官吏與夫韃靼色目之人亦如之十餘日乃止至正元年江浙行省平章政事只理瓦台入城之任日衣紅衣童謠曰火殃來矣至四月十九日杭州災燬官民房屋公廨寺觀一萬五千七百五十五間燒死七十六人明年四月又災甚於前自昔所未有也

皇明

太祖洪武八年甲寅冬十二月陝州人獻天書辭涉妄誕
斬之

英宗正統元年京師小兒會天旱祈雨口中群誦雨帝雨
帝城隍雨帝隨有土木之變 郕王以弟卽位蓋與弟
之謠至此始驗 十三年有人夢開黃榜傳第一名彭
時國子生其人言於朋輩徧傳都下又一人謂岳正曰
我昨夢見賢兄魁多士正曰若夢可信則已有人夢彭
時作魁矣其人戲曰會試廷試有兩魁二人各占其一
可也已而果然是時有童謠云衆人知不知今年狀元
是彭時亦不知何自而起也

世宗嘉靖十四年京師民謠有曰十萬呂文選一億汪尚
書蓋指汪鋐呂希周也時給事中孫應奎御史王廷等
各列鋐賊以謠爲證章十餘上鋐乃乞休希周已遷通
政弁罷 三十四年十二月浙直訛傳有物如蝴蝶夜
入人家變幻飛走禦之被傷如爪痕民間鳴鑼擊鼓爲
防或言是馬祖師術官司捕馬道士不得尋亦止息
穆宗隆慶二年正月江南訛言京師遣內臣選宮女于各
省自是民間室女節婦老少苟且婚配旬月殆盡士大
夫家亦爲之後來爭訟紛擾彌年乃定

今上萬曆二十六年正月兵部李禎奏本部哨役于部門
外通衢拾得亂言書冊言道言佛兼似怨忿又散非一

處拾非一人喧聞市井 二月南京守備邢奏二十
五年十二月二十二日安鄉伯張世恩等進內宿直捉
獲男子一名供名宋四八浙江杭州府錢塘縣人有東
陽人嚴師傅住離城二十里放光寺帶來經書口稱今
人有難觀音彌勒下界將此經書同至南京在皇城內
不拘官民看此可免災難引四八將書遺端門外白布
包黃紙裹書十七冊上有奏聞二字及指南書三字中
間語言荒唐不經煽惑人心

服妖

元世祖至元二十八年九月命尚衣局織無縫衣

射妖

金哀宗天興元年八月有箭射入宮中

毛蟲之異

宋

高宗建炎間荆南張四者虎突至其家急登梁喘伏虎未
之見也升堂脫其皮變爲男子遍歷室中及居側林莽
中尋之張乃下取其皮縛置梁上暮虎還視其皮大咤
曰吾奉天符取十七人止餘汝在善還我皮當捨汝張
乃應之曰還皮易耳汝卽食我柰何曰我雖異類不忍
負信遂出懷中天符索筆勾其名擲皮下虎蒙於體復
故形哮吼奮迅跳出明日聞六十里外夜大雷震死一
虎

遼太宗以唐天復二年生神光異常獵者獲白鹿人以為瑞
天顯三年二月憶隱涅里衮進白狼 九年正月
南京進白麀 會同元年二月室常進白麀 三年二
月獵水門獲白鹿 四年二月皇太子進白獐 六年
六月奚田勃德部進白麀

穆宗應曆二年十一月朔州民進白兔 十三年五月幹
郎改國所進花鹿生麀 十八年六月撻烈于鵬窠中
得牝犬來獻 十九年三月漢遣使進白鹿

與宗重熙二十一年九月平州進白兔

金

太祖未即位時使幹賽伐高麗為具於毬場以待捷音有

二麀渡水而至獲之太祖曰此休徵也言未既而捷書

至

熙宗皇統三年七月太原路進獬豸

海陵正統六年十月大軍伐宋將至廬州獲白鹿以為武
王白魚之兆

世宗大定四年七月嵐州進白兔二

章宗太和八年八月有虎至陽春門外駕出射獲之 元

光元年十月上獵近郊獲白兔群臣以為瑞明日御便

殿置鈴於頂將縱之兔驚躍不已忽斃几上 二年十

一月開封有虎害人是時屢有妖怪二年之中白日虎

擲門吏部及宮中有狐狼鬼哭於輦路

哀宗天興初荆王守純府第每夜房間群狐號鳴秉燭逐捕則失所在未幾哀宗遷歸德後崔立以城降而守純等皆死青城

元

太祖駐師西印度忽有大獸其高數丈一角如犀牛然能作人語云此非帝世界宜速還左右皆震懾獨耶律楚材進曰此名角端乃旄星之精也聖人在位則此獸奉書而至且能日馳萬八千里靈異如鬼神不可犯也帝卽回馭

天台陶九成曰稽之前志神禹氏治水功成天降飛兔日行三萬里而未嘗善言也又后土鐵蹄之獸至善言而未聞其獨角也軒轅獲飛黃而獨角漢武獲獸併角而五蹄又未嘗聞其善言能走也及聖祖誕膺天命而角端出焉夫一角者所以明海宇之一萬八千里之涉者所以示無遠弗届也

世祖至元二十八年虎入南城翰林侍講學士趙與票上疏言權臣專政之咎

成宗元貞三年海州牟平縣獲白鹿於聖水山以獻

順帝至正十年彰德境內狼狽爲害夜如人形入人家哭就人懷抱中取小兒食之是年浙江鄉試八月二十二日夜院中彷彿見一物馳過甚疾其狀如猛獸者軍卒從而喧哄因出角端爲賦題二十三年福州連江

縣有虎入於縣治 二十四年福州白晝獲虎於城西
績溪縣嘗有群虎入境又有猛獸如彪逐虎食之虎駭
而悉去

皇明

太祖洪武五年八月河南民獻白兔 命放之野 十年
冬十月初三有虎白日入漢西門傷二軍人其一死
詔赦徒役

成祖永樂二年甲申秋九月丁未 周王以騶虞來獻

是年八月 周王畋於鈞州獲一獸白質黑章貌首虎
軀其狀孔威不可迫視 王命部卒俟之其性馴擾因
召詢父老皆謂之騶虞至是 王率其屬表獻 闕下

十一年癸巳五月騶虞見于山東曹縣六月丁未朔
以獻白質黑章性仁而馴呂震請表賀 上曰汝能効
李沆爲人則善矣震退 上顧侍臣曰震可謂不學無
術者也 十六年耀州獻玄兔呂震請賀不許

宣宗宣德四年二月襄城伯李隆獻騶虞二云出滁州來
安縣石固山素質黑文馴狎不驚 上命群臣觀之胡
濙等請上表賀 上曰禎祥之興必有實德庶幾副之
朕嗣位今四年中外所任豈皆得人民生豈皆得所騶
虞之祥於德弗類唐太宗嘗曰堯舜在上百姓敬之如
神明愛之如父母動作興事人皆樂之發號施令人皆
悅之是大祥瑞朕與卿等宜共謹之若騶虞其免賀

宣宗宣德八年癸丑秋閏八月編脩許彬以麒麟獅子福鹿玄虎四祥進

孝宗弘治十一年六月京師西直門有熊入城守衛者不覺馬文升謂野獸不宜入城奏參守衛因乞嚴武備以防不虞兵部郎中何孟春謂同列曰熊之爲兆旣當被盜亦宜慎火同列莫曉亦幾城內在處有火災禮部焚旣而禁中亦火乾清宮焚或問孟春孟春曰予不曉占書曾記宋人紀紹興己酉永嘉災前數日有熊至城下州守高世則謂其倅趙允緇曰熊於字能火郡中宜慎火果延燒官民舍是年之語蓋憶此事而云耳不意亦驗

世宗嘉靖二十年人家生一犬八足四耳四目識者以爲犬羊入犯之兆後虜入大同掠萬餘人牛羊不計其數十二年癸巳春總理糧儲兼巡撫應天右副都御史陳軾以瑞兔獻 詔弗稱賀以禮部尚書夏言奏也

三十七年胡宗憲進白鹿秋八月宗憲又進白鹿 三十九年秋宗憲又進白鹿壽芝 四十年春正月陝西商南山萬壽宮前芝叢中土人得白鹿巡撫以獻 是年春二月南京錦衣指揮徐繼勳獻白鹿 四十三年甲子五月十六日祝壽生一子十八日又得一瑞莖是日內畜玉兔生二子閣臣徐階等率百官上表賀 四十五年丙寅夏六月二十五日太醫以瑞兔獻體備五

色迥異恒品

今上萬曆二十三年春三河縣民家毋彘生八小豕內有一人形者手足俱備但頭額上止有一眼產下能行其家以爲不祥斃之占者謂豕生人或人頭豕身爲邊鄙不寧之兆

麒麟

金熙宗天眷五年十月大名府進牛生麟

元

成宗大德九年二月大同平地縣迷兒的斤家牛生麒麟而死

武宗至大四年大同宣寧縣民滅的家牛生一犢其質有

麟無毛其色青黃類麟以其鞞上之

仁宗皇慶元年六月武安樂陽村產麒麟 二年二月是

村麒麟又生始生其母懼而不近三步之外直視之而鳴麟亦鳴聲不類犢

泰定帝三年湖州府長興州民王復家牛生一獸麟身牛尾口耳皆赤墮地卽大鳴毋不乳之具圖以上不知何獸或曰此瑞也宜令史官紀錄

順帝至正九年三月陳州楊家庄牛生黃犢火光滿室麻頂綠角間生綠毛不食乳二日而死

皇明

成祖永樂十二年榜葛刺王表獻麒麟 上命免賀

續文獻通考 卷之二十四
十三年麻林國進麒麟呂震請表賀 上曰翰林往日脩五經四書性理大全朕則許之麒麟有無何所損益其已之

馬異

宋寧宗嘉定十三年華容鄧氏馬產龍駒事聞命有司立馬監於此以識其祥後又產于其隣

蔣粹翁政和人宋季爲太學生元混一天下隱於蒲月山嘗言其先世家九峰山下畜一牝馬舍側有龍潭馬入浴其中龍與之媾而生龍駒龍首馬身狀如負河圖者後牧于山林竟失所在

皇明

成祖永樂十八年九月山東青州府諸城縣進龍馬縣馬嘗有牝于海濱者一日雲霧晦暝有物蜿蜒與馬接至是產駒鱗臄肉髮體具龍文其色青蒼蓋龍馬云

宣宗宣德七年五月太原忻州民人武煥家馬生一駒鹿耳牛尾玉面瓊蹄肉文被體如麟巡撫都御史于謙會同巡按三司視之咸謂其爲龍馬輿而進之禮部尚書胡濙請偕群臣上表賀 上曰二三年水旱告災者朕方日夕憂勵一獸之微何救民饑而欲表賀其止之

孝宗弘治元年戊申二月二十六日浙東處州景寧縣北屏風山有白馬成群首尾相銜從牛首山迤邐騰空而去聞是年陝西天門開人馬百萬自下而上大都所見

人馬皆鬼物之類甚可怪也

牛異

宋理宗端平元年八月紹慶府黃登進對奏武泰本唐武泰軍節度使今陛下潛藩陞為紹慶府臣到任後牛生獨角

金熙宗天眷七年十一月兵部尚書完顏秉德進三角牛

一作羊

元世祖至元十六年四月益都樂安縣朱十五家牛生犛犛兩頭四耳三尾其色黃生而即死

順帝至正十年秋襄陽車城民家牛生犛五足前三後二十六年春汴梁祥符縣牛生犛雙首二日即死

十八年五月東昌聊城縣錢鎮撫家生黃犛六足前三後四二日而死

皇明

世宗嘉靖五年河南南陽縣牛生犛一首兩身是年禮部尚書席春奏有牛產犛一身二首腹內心肺膽各二

是年南城縣有虎手足如人傷噬人畜無算十一月年貴州銅城府平山衛軍餘范璽家于二月三十日黃犛牛生犛頭額豐滿牙齒巉巖前二膝至足并尾俱成

麟甲甲內有毛渾身有紋落地而死四十年福建漳浦縣牛生犛三目三角人以為牛妖

今上萬曆二十四年正月瀘州張四兒家訟于州稱四兒

業屠牛衛軍馬洋回回種也性亦嗜食牛自鄉牽牛赴州至大渡口登舟牽繩忽斷牛奔入市過四兒家四兒恃力直前縛之不能制大懼奔入一店中牛亦追入店四兒登樓牛亦登樓觸四兒腸出死牛下樓復轉入一巷中覓一牛肉肆適其主他出盡毀其家器業始徐徐出郊聞之客店樓小梯狹而牛上下無碍其事甚怪

羽蟲之異

宋永州澹岩有馴狐凡貴客至則鳴鄒浩將至而狐鳴寺僧出迎浩怪之僧以狐鳴爲言浩常有詩云走入山來亦偶然初聞消息與人傳馴狐底事先知得隔夜飛鳴報老禪 長安女紹蘭適任宗宗爲賈湘中數年不歸

暗梁燕而語之曰吾聞燕自海東來往必由湘中欲憑汝附書於夫言訖淚下燕頰頰若有所諾復曰若允當拍我懷燕遂棲膝上蘭以詩繫足云一自去重湖臨臆泣血書殷勤憑燕翼寄與薄情夫宗時在荊州忽燕子拍于肩解足書視之感泣遂歸 應山有字鴈媒者宿媒沙中諸群鴈聞其聲而至則掩取之三年矣一日中正鴈哀鳴而下與媒交其項弗釋併死之字者遂不復

七

遼太宗生時獵者獲白鷹人以爲瑞 天顯九年八月遼王自將南伐搜刺解里手接飛鴈上異之因以祭天地十一年八月遼王自將以援石敬瑭有飛鴛自墜而

死南府夷離董曷魯恩得之以獻上之吉上曰此從珂自滅之兆也後果有應

穆宗應曆二年十月司徒老古等獻白雉

聖宗統和四年四月親征宋次沙姑河之北旋以近侍粘米里所進自落鴉祭天地 十一月伐宋捷還次白佛塔獲自落馴狐以爲吉徵祭天地 九年八月東京進三足鳥

興宗重熙中劉伸爲崇義軍節度使政務簡靜民用不擾致烏鵲同巢之應詔褒遷其官

金太宗天會四年八月新城縣進白鳥

熙宗天眷十五年七月有司進四足雀

世宗大定二十九年十二月密州進白鶉白雉各一

宣宗元光二年正月有鶴千餘翔于殿庭移刻去是時烏鵲夜驚飛鳴蔽天其諸妖怪甚多十二月帝崩

元世祖至元五年秋七月螟生牧野南尋有鸚鵡自西北踰山來方六七里間林木皆滿遂下啄蝗食且盡乃作陣飛去

成宗大德三年七月揚州淮安蝗在地者爲鴛啄食飛者以翅擊死乃禁捕鴛

順帝至正十一年五月興國有大鳥百餘飛至郡西白郎山巔狀如人立去而復至者數次 十九年京師鴟鴞夜鳴達旦連月乃止有杜鵑啼於城中居庸關亦如之

二十七年三月丁丑朔萊州招遠縣大社里黑風大起有大鳥自南飛至其色蒼白展翅如席狀類鶴俄頃飛去遺下粟黍稻麥黃黑豆蕎麥于張家屋上約數升許是年大稔

皇明

太祖洪武十一年戊午元旦早朝有鴟鴞自天而墮死于丹墀見者異之

孝宗弘治十四年二月保定府臣獻白鴉以爲祥瑞禮部尚書傅濟劾其不當奏 詔斥遣之

世宗嘉靖四十一年湖廣巡撫都御史徐南金獻白鵲

鳳凰

遼天祚帝乾統四年十月鳳凰見於遼陰

金章宗泰和二年八月磁州武安縣鼓山石聖臺有大鳥十集於臺上其羽五色爛然紋多赤黃赭冠雞項尾濶而修狀若鯉尾而長高可逾人九子差小侍旁亦高四五尺禽鳥萬數形色各異或飛或蹲或步或立皆成行列首皆正向如朝拱然初自東南來勢如連雲聲似啓雷林木震動牧者驚惶卽驅牛擊物以驚之殊不爲動俄有大鳥如鵬鷲者怒來搏擊之民益恐奔告縣官以爲鳳凰也命工圖上之留二日西北去按視其處糞迹數頃其色各異遺禽數千累日不能去所食皆巨鯉大者丈餘魚骨蔽地以其事告宗廟詔中外

元順帝至正十一年廣西慶遠府有異禽雙飛見於述昆鄉飛鳥千百隨之蓋鳳凰云其一飛去其一留止爲獵人射死首長尺許毛羽五色有藏之以獻于帥府者久之其色鮮明如生云

雞異

宋度宗咸淳五年雞翼生距

元順帝至正十七年春三月上海李勝一家雞伏七雛一雛作牡雞狀鼓翼長鳴明年戊戌春正月錢塘盧子明家一雞伏九雛一雛有四足二足在翼下不數日皆死而各家亦無他異至正二十二年龍泉縣人家一雞二形一邊毛羽純雄一邊毛羽純雌能雄鳴又能雌伏有子纍纍然

皇明

孝宗弘治十四年春湖廣華容縣紅柿村民劉福家雞生雛三足

世宗嘉靖四年長垣縣民王憲家雞抱卵內成人形耳目口鼻四肢皆具

鴨異

今上萬曆甲申年廣濟龍江鎮民某家群鴨中一鴨獨呼云筭帳始一婢聞之旣而群聽無不聞者以告於其家翁翁聽亦然遂怒殺之置釜中愈烹愈大如鴛皆不敢

食投之江中已而無故構異訟家貲盡破蓋其先世皆業屠而翁又橫暴好漁奪人貲所謂筭帳必有陰王者龍蛇之異

宋陶弼永州人游吳中舟行忽雙鯉戲溪上傍一老父曰此龍也行且鬪若亟去去百步許雷大震岸圮木拔二十餘舟皆覆弼舟獨完

端宗崩衆共立衛王年八歲方登壇禮畢御輦所向有龍拏空而上

遼太祖神冊五年五月有龍戰于洩刺山陽水上上射獲之藏其骨於府內 天顯元年七月次扶餘府城上見黃龍繚繞長可一里光耀奪目入于行宮有紫黑氣蔽

天逾日帝崩太宗改扶餘府爲黃龍府

聖宗時蕭蒲奴幼孤貧傭於醫家牧牛傷人稼數遭笞辱醫者嘗見蒲奴熟寢有蛇遶身異之教以讀書聰敏好學不數年涉獵經史習騎射仕終奚部六大王蓋龍種也

興宗時蕭柳從伐高麗遇大蛇當路前驅者請避柳曰壯士安懼此拔劍斷蛇而進卒破敵

天祚帝爲金所逼渡河奔夏帥耶律敵烈等劫雅里北走至沙嶺見蛇橫道而過識者以爲不祥後雅里雖立爲帝不久亦死

金熙宗天眷元年夏見一蒼龍一爪承一嬰兒兒爲龍所

戲畧無懼色三日如故 皇統九年四月有龍闖于利

州榆林河上大風壞民居官舍 詳見風門

世宗未卽位時在遼陽一日方寢有紅光照室及黃龍見

於寢上後復有雲氣自西來黃龍見其中卽于是年登

位 大定十四年八月次紉里赤日中白龍見于御帳

之東小港中旣而乘雲上升尾猶曳地良久北去

章宗明昌五年七月有龍曳尾於殿前 六年八月大雨

雷電有龍起於渾儀驚跌臺忽中裂而摧儀仆於臺下

宣宗貞祐二年正月次宜春有黃龍見於西北

元世祖至元二十六年六月中大雨汲郡河西鄉農有王氏

家甫夕黑霧四塞窓戶間寒凜不可勝視之有蒼龍蜿

蜒在氣中起而復墮者再時王女下堂驚仆於地救之

乃甦問所見亦同少頃霆震霧散失所在明日視其地

鱗髯印泥尚宛然

順帝至元五年六月長汀縣山蛟出大雨驟至平地湧水

深三丈餘飄沒民居八百餘家壞田二百餘頃 至正

十五年七月橋李城東馬橋上白龍掛烈風怪雨天闇

黑如深夜壞民居百餘所大木盡拔木自半空墮下悉

折爲二雜以萬瓦亂飛溪水直立人皆叫號奔走不暇

顧妻子龍由馬橋歷城北望太湖而去有聲如萬屋齊

壓四望黑雲洶湧失府城所在經一二時方闌霽不一

年爲戰鬪之地凡龍所過處荆棘寒煙視昔日之繁華

頓如一夢 十七年六月溫州有龍鬪於樂清江中颶
風大作所至有光如毬死者萬餘人 八月祥符縣西
北有青白二龍見若相鬪之勢良久而散 二十三年
正月廣西貴州江中有物登岸蛇首四足而青色長四
尺許軍民聚觀而殺之 二十四年六月保德州有黃
龍見於咸寧井中 二十七年六月皇太子寢殿新甃
井成有龍自井而出光焰燦人宮人震懾仆於地又宮
墻外長慶寺所掌成宗幹耳朶內大槐樹有龍纏擾其
上良久飛去樹皮皆剝 七月益都臨朐縣有龍見於
龍山巨石重千斤者浮空而起 二十八年十月大同
路懷仁縣河岸崩有蛇大小相綰結可載數車

皇明

憲宗成化初唐縣於水村人自京至完縣玉山店見二猪
戲溝中頃之入大石下隨率少年持挺移石視之時天
大旱烟雲四起雷雨交作識者知其爲龍也自是每旱
移石輒雨垂四十年後移之不驗或以爲龍移他處耳
五年六月初九日河决杏花營水及堤有龍卵見先
是河水溢三司官具牲醴于河神俄而漁者於河濱拾
一卵以獻眾觀之甚異以手撼之中汨汨作水聲其形
大如人首下銳上員質青白微具五色又多黧黑點持
之甚重氣煖而澤潤人不知其爲何祥有占者云江湖
見龍卵主大水吳郡劉昌謂龍有胎未聞卵生或曰蛇

續 卷之二十四
亦卵生茲固其類歟 十四年間吳越大水淫雨不絕
各處多出蛟出時其山中先有大火燒地及左右草木
皆披靡成一徑既入水成驢形但不見足浮游江中而
去 湖州郡丞藍備鄧州人常道其令蜀邑時適郊有
蛇當道驅之不去公曰必鳴寃也令人隨其所之至一
野塘止卽令斲去其水得隻磨有伏屍而不知誰氏備
令徧求村中磨合者果得焉盖有商客其家相其橐重
因殺之沉屍野塘而覆以磨讞得實罪死復移文招其
子至以橐歸焉

魚異

宋彬州支邑村民圃地昔之達官故宅基其畔有池水泓
澄常見雙鯽比翼而嬉經數歲無他鱗民投網取之不
可得後潭竭于泥內獲一銅盆中鑄兩魚形與向見者
不異注水魚撥刺如前

龜異

遼太宗會同三年四月南塘進白龜
皇明

世宗嘉靖四十一年御院龜生卵者五
豕異

元順帝至正三年秋建寧浦縣民家豕生豚二尾八足
十二年江陰永寧鄉陸氏家一豬產十四兒內一豚人
之首面手足而豬身 十五年鎮江民家豕生豚如象

形 二十四年保德州民家豕生豚一首二身八蹄二尾 又海鹽趙氏營室以居宰猪落成小腸皆已脩治忽併如蛇蜿蜒而走將及里許而止

犬異

宋寧遠縣民畜一犬一日跣足坐垂堂犬忽齧其履置諸門主訝而逐之復齧而前再逐復前既里許乃止及回顧則家已陷矣 咸溪童鏞家畜二犬一白一花共出一母性狡獪善知人意後白者雙盲弗能進牢而食主家作窩卧於簷外花者日啣飯吐而飼之夜則卧于其旁白者既死主憐之埋于門前山麓間花者朝夕往埋所遶數匝若拜泣狀卧其旁少頃始返

元成宗元貞丙申秋大都南城武仲祥家有乳犬懷胎左脇下忽腫成瘡六七日後于瘡内生五子色皆青蒼每當舂梁自頂至尾生逆毛一道他無所異又數日瘡亦平復

順帝至正二十二年八月上海縣金壽一家已闔雄狗生小狗八其一嘴爪紅如鮮血然牡物而生兒陽化陰也又犬屬火一嘴爪紅亦火也豈非主兵火者與

蟲異

宋永州通判廳軍員毛景得奇疾每語喉中輒有蟲作聲相應有道人令學誦本草藥名至藍而默然遂取藍搨汁飲之少頃嘔出肉塊長二寸餘人形悉具

遼太宗會同四年七月有司奏神靈車有蜂窠成密詔卜之吉

金太宗天會三年七月錦州野蠶成繭以絲綿來獻詔賞其長吏

章宗明昌四年六月邢洛深冀及河北西路十六謀克之地野蠶成繭 承安元年六月平晉縣民利通家蠶自成錦段長七尺一寸五分濶四尺九寸詔賜絹十疋

元世祖至元中許州麥熟時有青蟲如蝨食麥人無可柰何忽生大華蟲盡嚼之 四年六月中都順天東平等處蠶皆災 七年東平大名等路桑蠶皆災 十一年

諸路野蚘等蟲災凡九所 十七年二月真定七郡桑有蟲食之 二十二年真定廣平河間恩州大名濟南

蠶災 二十三年五月廣平等路蠶災 十月興化路仙遊縣虫傷禾 二十九年滄州維州中山元氏無棣

等縣桑蟲食葉蠶不成 成宗元貞元年真定中山靈壽二縣桑有蟲食之 五月

隨州野蠶成繭數百里民取為繒 大德五年四月彰德廣平真定順德大名等郡蟲食桑 七年五月濟寧

等處蟲食桑 時仁宗在潛邸日奉答吉太后駐輦懷孟時苦群蛙亂鳴終日不寐翌旦太后命近侍傳旨諭

之曰吾母子方憤憤蛙忽惱人耶自後其母再鳴故今

此地雖有蛙而不作聲

武宗至大元年五月大名廣平真定三郡蟲食桑

泰定帝至和元年六月河南德安屯蠖食桑

文宗大曆二年春二月真定平山縣蟲食桑盡其葉而蟲俱死 三月滄州高州及南皮塩山武城等縣桑蟲食

之如枯株魏縣有蟲食桑且盡蟲俱死 至順二年三

月真定路蟲食桑爲災冠州蟲食桑四萬株晉冀深蠶等州及鄆城延津二縣蟲夜食桑晝匿土中人莫捕之

五月曹州禹城保定博野東昌封丘等縣蟲食桑皆盡 三年大名諸路有蟲食桑葉且盡

順帝至正初盧文壁尹荆山忽有一巨蛙登廳前兩目睜視類有所訴者令卒尾之行去縣六七里有廢井遂跳

入不出旣得報往集里社汲井獲屍乃日前二人同出

爲商一人謀其財而殺之擒捕究問抵罪死者之家云其在生不食蛙見則買放 三年六月梧州青蟲食稼

十年七月同州蟲食稼郡守石亨祖禱於玄妙觀寒雨三日蟲盡死

蝗

宋寧宗嘉定元年徽郡飛蝗大起田野驚憂 七年六月

浙東西郡縣蝗 八年兩浙江東西路旱蝗 四月飛

蝗入畿縣自夏至秋蝗患不息諸道捕者以千萬石計民爭捕官以粟易

理宗紹定三年福建蝗

遼聖宗統和三年九月東京平州旱蝗 咸雍三年南京旱蝗 九年七月南京奏歸義涑水縣蝗飛入宋境餘為蜂所食

道宗太原七年五月有司奏永清武清固安三縣蝗 大安四年八月有司奏宛平永清蝗為飛鳥所食 壽隆四年七月南京蝗時蕭文知易州屬縣議捕除之文曰蝗乃天災捕之何益但反躬自責于是蝗盡飛去遺者亦不食苗散在草莽間為鳥鵲所食

金熙宗皇統二年七月廣寧府蝗 海陵正隆三年六月蝗入京師 秋中都山東河東蝗 太宗天會二年曷懶移鹿古水霖雨害稼且為蝗所食

世宗大定三年二月中都以南八路蝗 四年八月中都南八路蝗飛入京畿時完顏宗寧為歸德軍節度使督民捕蝗得死蝗一斗給粟一斗數日捕絕 十六年五月中都河北山東陝西河東遼東等十路旱蝗 二十二年五月慶都蝗蝻生散漫十餘里一夕大風蝗皆不見

章宗太和八年四月河南蝗遣使分路捕之 六月飛蝗入京畿 七月詔頒捕蝗圖于中外

宣宗貞祐三年五月河南大蝗 四年五月陝西大蝗 七月飛蝗過京師 興定元年三月宮中有蝗 二年四月河南諸郡蝗

哀宗正大三年四月旱蝗

元

世祖中統三年五月真定順天邢州蝗 八月濱棣州蝗

四年六月燕京河間益都真定東平蝗 至元元年

七月益都大蝗 十二月西京北京順德徐宿邳等州

郡蝗 三年東平濟南益都平灤洛磁順天中都河間

北京祿豐縣真定路蝗 四年山東河南北諸路蝗

五年六月東平等郡及真定蝗 六年六月河南河北

山東諸郡蝗 七年三月益都登萊蝗 七月南京河

南山東諸路蝗 八年六月上都中都大名河間益州

順天懷孟彰德濟南真定衛輝平陽歸德順德等路淄

萊洛磁等州蝗 十五年七月濮州蝗 十六年四月

大都十六路蝗 六月左右衛屯田蝗蝻生 十七年

五月沂州及漣海邳都等州蝗 十八年順德九縣蝗

十九年四月別十八里部東二百餘里蝗害麥 夏

東平東阿陽穀等處大蝗 二十一年中衛屯田蝗

二十二年大都汴梁益都廬州河間濟寧歸德保定京

師大蝗害稼 二十五年七月真定汴梁蝗 八月趙

晉冀三州蝗 二十七年四月河北十七郡蝗 二十

九年六月東昌濟南般陽歸德等郡蝗 三十年九月

登州蝗 三十一年六月東安州蝗

按釋者謂蝗蟲有甲飛揚之類陽氣所生也恒陽則有

介蟲之孽於春夏爲螽今謂之蝗按劉歆云貪雀取民則螽與魚同占

成宗元貞元年六月汴梁陳留太康考城等縣睢許等州蝗 二年六月濟寧任城魚臺縣東平須城汶上縣開

州長垣清豐縣德州濟河縣滑州太和州內黃縣蝗

八月平陽大名歸德真定等郡蝗 大德元年六月歸

德順德邳州徐州蝗 二年四月江南山東兩淮江浙

燕南屬縣百五十處蝗 三年五月淮安屬縣蝗有鶯

食之 十月隴陝蝗 五年六月順德路淇州蝗 七

月廣平真定等路蝗 八月河南淮南睢陳唐和等州

新野汝陽江都興化等縣蝗 六年四月真定大名河

間等路蝗 七月大都涿順固安三州及濠州鐘離鎮

江丹徒等縣蝗 七年五月益都濟南等路蝗 六月

大都路蝗 八年四月益都臨朐德州齊河蝗 九年

四月真定蝗 六月通泰靖海武清等州縣蝗 八月

涿州良鄉河間南皮泗州天長等縣及東安海鹽等州

蝗 十年四月大都真定河間保定河南南郡蝗 六月

龍興南康等郡蝗

武宗至大元年澶濮曹高唐等州蝗 五月晉寧路蝗

六月保定真定二郡蝗 八月淮東蝗 二年四月益

都東平東昌順德廣平大名汴梁衛輝等郡蝗 六月

檀霸曹濮高唐太安等州良鄉野城歷陽合肥大寧江

寧句容溧水上元等縣蝗 七月濟南濟寧般陽河中

解絳耀同華等州蝗 八月真定保定河間懷孟等郡

蝗 三年四月鹽山寧津堂邑茌平陽穀高唐禹城七

縣蝗 七月磁州威州饒陽元氏平棘滏陽元城無棣

等縣蝗

仁宗皇慶元年彰德安陽縣蝗 延祐七年六月益都路

蝗

英宗至治元年五月霸州蝗 七月江都泰興古城通許

臨淮盱眙清池等縣蝗 十二月寧海州蝗 二年汴

梁祥符縣蝗有群鷺食之既而復吐積如丘垤冬十二

月濟寧蝗 三年五月保定路歸信縣蝗 五年大名

蝗

恭定帝元年永興蝗 六月大都順德東昌衛輝保定益

都濟寧彰德真定般陽廣平大名河間東平等郡蝗

二年汴梁十五縣蝗 五月彰德路蝗 六月德濮曹

景等州歷城章丘淄州柳城荏城等縣蝗 九月濟南

歸德等郡蝗 三年六月東平須城縣與國永興縣蝗

七月大名順德廣平等路趙州曲陽蒲城慶都修武

等縣淮安高郵二郡睢泗雄霸等州蝗 八月永平汴

梁懷孟等郡蝗 四年五月洛陽縣有蝗五畝群鳥盡

食之越數日又集鳥又食之 六月畿內江南蝗 七

月籍田蝗 八月冠州蝗 十二月保定濟南衛輝濟

寧廬州五路南陽河南二府博野臨淄膠西縣蝗 致
和元年四月大都薊州永平路石城縣鳳翔岐山縣蝗
無麥苗 五月潁州及汲縣蝗 六月武功縣蝗

文宗天曆二年大名路諸州縣開滑諸州蝗 四月河南

大寧與中州懷慶孟州廬州無為州蝗 六月益都莒

密二州蝗 七月真定汴梁永平淮安廬州大寧遼陽

等郡屬邑蝗 三年五月廣平大名般陽濟寧東平汴

梁南陽河南等郡德濮開高唐等州蝗 至順元年六

月真定薊薊固安博興等州蝗 七月解州華州及河

內靈寶延津等二十二縣蝗 又永城蝗 二年三月

陝州諸縣蝗 六月孟州濟源縣蝗 七月河內閩郭

陝縣奉元蒲城白水等縣蝗

順帝元統二年六月遼西蝗 至元二年七月黃州蝗

三年六月懷孟隰州汴梁陽武縣蝗 五年七月膠州

卽墨縣蝗 至正四年歸德府永城縣及亳州蝗 十

二年六月大名蝗 十七年東昌荏平縣蝗 十八年

夏薊州遼州濰州昌邑縣膠州高密縣蝗 秋大都廣

平順德及濰州之北海莒州之蒙陰汴梁之陳留歸德

之永城皆蝗順德九縣民食蝗廣平人相食 十九年

大都霸州通州真定彰德懷慶東昌衛輝河間之臨邑

興州大同寧冀二郡文水榆次壽陽徐溝四縣沂汾二

州孝義平遙介休三縣晉寧二州及壺關潞城襄垣三

縣霍州趙城靈石二縣隰州之永和沁之武鄉遼之榆
杜奉元及汴梁之祥符原武鄆陵扶溝杞尉氏洧川七
縣鄭之滎陽汜水許之長葛鄆城襄城臨潁鈞之新鄭
密縣皆蝗食禾稼草木且盡馬不能行坑塹皆盈饑民
捕蝗以為食或曝乾而積之又盡則人相食五月大蝗
七月淮安清河縣飛蝗蔽天自西北來凡經七日禾
稼俱盡 二十年益都臨朐壽光三縣鳳翔岐山縣蝗
二十一年六月河南鞏縣蝗食稼俱盡 七月衛輝
及汴梁滎澤縣鄭州蝗 二十二年秋衛輝及汴梁開
封扶溝洧川三縣許州及鈞之新鄭密二縣蝗 二十
五年鳳翔岐山縣蝗 續溪縣有蝗自西北蔽空而至

螟 蝻 蚱 蝻 蝻

宋寧宗嘉定十四年金華衢州寧波台州温州有蝻賊
十六年秋永州道州螟

金章宗明昌三年秋綏德好蚘蟲生

宣宗貞元四年五月鳳翔扶風岐山郿縣蝻虫傷麥

元世祖至元八年六月遼州和順縣解州聞喜縣好蚘生

十八年高唐夏津武城縣蝻害稼 二十三年五月

霸州滹州蝻 二十四年鞏昌好蚘為災 二十七年

四月發州蝻害稼雷雨大作蝻盡死是年大有

按漢志云温而風則生螟蝻有螺蟲之孽

成宗元貞元年六月利州龍山縣益州明山縣螟 大德

九年七月桂陽郡蝻

武宗至大元年五月東平東昌益都等郡蝻

仁宗皇慶二年五月檀州及獲鹿縣蝻 延祐二年處州

螟 七年七月霸州及堂邑縣蝻

泰定帝二年處州螟 四年七月奉元路咸陽興平武功

三縣鳳翔府岐山等縣蚳蚳害稼

文宗天曆二年淮安廬州安豐三路屬邑螟

順帝至正十年處州螟 十六年處州螟 十九年濟南

章丘鄒平三縣蝻五穀不登 二十二年春衛輝路螟

六月膠水縣蚳蚳生 七月掖縣蚳蚳生害稼 二

十三年六月寧海文登縣蚳蚳生 七月萊州招遠萊

陽二縣及登州寧海州蚳蚳生

皇明

英宗正統元年丙辰夏四月河北旱蝗 八年五月畿內

旱蝗

憲宗成化三年七月巡撫王恕奏開封彰德衛輝地方蝗

蝻傷稼 九月河間府蝗

世宗嘉靖八年陝西僉事齊之鸞言河南光息蔡頴諸處

及陝西陝關潼關蝗食禾穗殆盡 上下其章于部

鼠妖

元世祖至元二十二年六月馬湖田鼠食稼殆盡總管祠

而祝之鼠悉赴水死

續文獻通考 卷之二百二十四
順帝至正十五年湖廣群鼠數十萬越洞庭湖望四川而去
去 二十年八月慶遠延安寧安等州野鼠食稼初由
鵝卵化生既成牝牡生育日滋百畝之田一夕俱盡
二十六年泗州潁淮兩岸有灰色黑鼠暮夜出穴成群
覆地食禾

皇明

武宗正德初黃州師巫竇均在飛喪崖見一鼠盤旋道上
忽入地穴其下得一鈕銅印上篆扶蠶王印用署符呪
能呼風雷後損柄不驗

世宗嘉靖中臨江李鏊投徒湖口所居卑隘而旁有樓崇
敞然封鑰甚固請居之主人日中有怪物常魘人死鏊
曰邪不勝正安有是理因徙居其中一日外出留一冠
者攝課讀夜分忽一神至貌甚猙獰戴金幘頭絳袍象
簡髯垂至腹冠者懼不敢仰視次日鏊歸言狀鏊曰貴
神福人此貧士之資何懼後果再至袍笏端凝如前顧
鏊作怒鏊趨而進自陳且有祈請神不對但吹鏊左耳
耳卽聾鏊怒知不免舉向所備防身大槌盡力一擊中
胸有聲啣然遁去遲明報主來索怪踪跡至北廊垣曲
有大穴一鼠如斗作赤色髯長尺餘稱之重七觔胸有
凝血以中其要害故僅能入穴死王元禎記

清人編纂
卷之二十四
二十四

卷之二十四終



